

唐·道宣撰

釋迦方志

佛陀教育基金會
印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

釋迦方志序

唐終南太一山釋道宣撰

惟夫大唐之有天下也將四十載淳風洽而澆俗改
文德修而武功暢故使青丘丹穴之候竝入提封龍
沙鴈塞之區聿遵聲教英髦稽首顯朝宗之羽儀輸
琛奉贄表懷柔之盛德然則八荒內外前史具舒五
竺方維由來罕述豈非時也雖復周穆西狩止屆崑
丘舜禹南巡不踰滄海秦皇畫野近表臨洮漢武封
疆關開鐵路厥斯以降遐討未詳所以崆峒問道局
在酒泉之地崑崙謁聖實惟玉門之側至於弱水洞

庭三危九隴。煙然龍勒。沙障黎河。具曆夏書。咸圖雍部。及博望之尋河也。創聞大夏之名。軒皇之遊夢也。初述華胥之國。貳師之伐大宛。定遠之開鐵門。由余入秦。日磧仕漢。聲榮覆於蔥嶺。帝德亘於耆山。赫奕皇華。其徒繁矣。而方土所記。人物所宜。風俗之沿革。山川之卓詭。雖陳之油素。略無可紀。豈不以經塗遼遠。遊詣之者希乎。以事討論。縱有傳說。皆祖行人。信非躬覩。相從奔競。虛爲實錄。何以知其然耶。故積石河源。西瞻赤縣。崑崙天柱。東顧神州。鳴沙以外。咸稱胡國。安用遠籌。空傳緗簡。是知身毒之說。重譯臻焉。

神異等傳斷可知矣。自佛教道東。榮光燭漢。政流十
代。年將六百。輜軒繼接。備盡觀方。百有餘國。咸歸風
化。莫不梯山貢職。望日來王。而前後傳錄。差互不同。
事迹罕述。稱謂多惑。覆尋斯致。宗歸譯人。昔隋代東
都。上林園翻經館。沙門彥琮著西域傳一部十篇。廣
布風俗。略於佛事。得在洽聞。失於信本。余以爲八相
顯道。三乘陶化。四儀所設。莫不逗機。二嚴攸被。皆宗
慧解。今聖迹靈相。雜沓於華胥。神光瑞影。氤氳於宇
內。義須昌明。形量動發。心靈泊貞。觀譯經嘗參位席。
傍出西記。具如別詳。但以紙墨易繁。閱鏡難盡。佛之

遺緒釋門共歸故撮綱猷略爲二卷。貽請後學序之云爾。

釋迦方志一部八篇。

封疆篇第一。

1

統攝篇第二。

2

中邊篇第三。

3

遺跡篇第四。

6

遊履篇第五。

149

通局篇第六。

157

時住篇第七。

183

教相篇第八。

185

仰尋諸佛之降靈也不可以形相求之隨機顯晦故

得以言章述矣。然學教者統舉爲先。傍窮枝葉終非
遠致。故於篇首標其致焉。

釋迦方志卷第一

唐終南太一山釋道宣撰

封疆篇第一

佛之所王土也號曰索訶世界卽古翻經爲娑婆矣
經中所謂忍土者也謂此土人強識力念能忍苦樂
堪任道器故佛王之案此封疆周輪鐵山山外是空
空不可測山下是地地下是金金下是水水下是風
其風堅實逾於金剛眾生心力同業所感能持世界
不令傾墜自風以外卽是虛空約此周輪從下而上
至無色窮名爲有頂論其畫界縱廣所經卒非里數

之所度也。且如智度論從色界天上一大石經一萬八千三百八十三年方始至地。約此上下方維名爲一佛所王土也。卽以大千鐵圍而爲封疆之域。

統攝篇第二

案索訶世界鐵輪山內所攝國土則萬億也。何以知之。如今所住卽是一國。國別一蘇迷盧山卽經所謂須彌山也。在大海中據金輪表。半出海上。八萬由旬。日月迴轉於其腰也。外有金山七重圍之。中各海水具八功德。其外鹹海廣於無際。海外有山是鐵所成。四周繞之。海中可居者六略有四。卽約蘇迷山用分

方面東州名毗提訶南州名瞻部西州名瞿陀尼北
州名拘盧也。此之四州亦名四有。人之所居佛之所
王。準此傍及鐵圍海內唯有四州。蘇迷山已上二十
八天井。一日月爲一國土。卽此爲量數至一千。鐵圍
都繞名小千世界。卽此小千數至一千。鐵圍都繞名
中千世界。卽此中千數至一千。鐵圍都繞名爲大千
世界。案此三千大千世界。其中四州山王日月乃至
有頂。則有萬億之所。皆爲佛之統攝。俱遵聲教。

中邊篇第三

惟夫法王所部則大千之內攝焉。若據成都則此州

常爲所住故。此一州則在蘇迷山南之海中。也。水陸所經東西二十四萬里。南北二十八萬里。又依論說三邊等量二千由旬。南邊三由旬半。是則北闊而南狹。人面象之。又依凡記人物所居。則東西一十一萬六千里。南北遠近略亦同之。所都定所。則以佛所生國迦毗羅城。應是其中。謂居四重鐵圍之內。故經云三千日月萬二千天地之中央也。佛之威神不生邊地。地爲傾斜。故中天竺國如來成道樹下有金剛座。用承佛焉。據此爲論。約餘天下以定其中。若當此州義約五事以明中也。所謂名里時水人爲五矣。

所言名者。咸謂西域以爲中國。又亦名爲中天竺國。此土名賢談邦之次。復指西宇而爲中國。若非中者。凡聖兩說不應名中。昔宋朝東海何承天者。博物著名羣英之最。問沙門慧嚴曰。佛國用何曆述而號中乎。嚴云。天竺之國。夏至之日。方中無影。所謂天地之中平也。此國中原景圭測之。故有餘分。致曆有三代大小二餘。增損積算。時輒差候。明非中也。承天無以抗言。文帝聞之。乃敕任豫受焉。

夫以八難所標邊地。非攝出凡入聖。必先中國。故大夏親奉音形。東華晚開教迹。理數然矣。

二言里者夫此一州大分三量。二分以北土曠人希
獯狁所居無任道務。一分以南盡於三海。人多精爽
堪受聖化。故約道勝大聖都焉。故成光子云。中天竺
國東至振旦國五萬八千里。振旦即神州之號也。彼人目之。南至金
地國五萬八千里。西至阿拘遮國五萬八千里。北至
小香山阿耨達池五萬八千里。觀此通攝取其遐邇
齊致以定厥中。其理易顯。

三言時者謂雪山以南名爲中國。坦然平正。冬夏和
調。卉木常榮。流霜不降。自餘邊鄙安足語哉。

四言水者此州中心有一大池名阿那陀。答多。唐言

無熱惱也。卽經所謂阿耨達池。在香山南大雪山北。居山頂上。非凡所至。池周八百里。四岸寶飾。正南當於平地。地獄所居。故金剛座東僻至五千里。又池正南當州尖處。其北當謎羅川。卽北又當蔥嶺北千泉也。上空定約當北辰星。今望第五。似如西敬。且天上一寸地。下一千千源。去京八千餘里焉。約天無一尺矣。其池北去鉢露羅國。減千里。東南屈露多國。西南罽賓國。各千餘里。然四海爲壑。水趣所極。故此一池分出四河。各隨地勢而注一海。故蔥嶺以東水注東海。達儼以南水注南海。雪山以西水注西海。大秦以

北水注北海。故地高水本注下。是其中此居海濱。邊名難奪。又佛經宏大通舉事。周博見聖賢義。非妄委於土。所列咸符地圖。然此神州所著書史。寓言臆度。浮濫極多。時約佛經更廣其類。都皆蕪穢。試爲舉之。水經云無熱丘者。卽崑崙山。又扶南傳云阿耨達山。卽崑崙山。又山海經云南流沙濱赤水。後黑水前有大山名崑崙丘。又云鍾山西六百里有崑崙山。出五水。案穆天子傳云春山。音鍾又云海內崑崙丘。在西北帝之下。方八百高萬仞。又十州記云崑崙陵卽崑山。也在北海亥地。去岸十三萬里。此約指佛經蘇迷山。

也。又東海中山名方丈亦名崑崙。又云西王母告周穆云山去咸陽三十六萬里高平地三萬六千里。又周穆傳述西王母云去宗周灋澗一萬一千一百里。神異經崑崙山有銅柱其高入天圍三千里。榮氏注云柱州崑崙山東南萬二千里有無外山。史記云崑崙山去嵩高五萬里高萬一千里。郭璞云高二千五百餘里。淮南云高萬一千一百里十四步二尺六寸。道經造立天地記云崑崙山高四千八百里。又轉形濟苦經云高萬九千里。又云此山飛浮。又云崑崙山南三十里次第有千崑崙山名小千世界。化胡經云崑

山高九重相去各九千里。又云高萬萬五千里。已前
儒道兩說。雖形量差異。莫越崑崙。崑崙近山。則西
涼酒泉之地。穆后見西王母之所。具彼圖經。若崑崙
遠山。則香山雪山之中也。河源出焉。故爾雅云。河出
崑崙墟。郭璞圖讚云。崑崙三層。號曰天柱。實惟河源
水之靈府。案禹貢云。導河自積石者。但據伏流所出
處而名之。若討本源。誠有由矣。故佛經云。此無熱池
東有銀牛口。出殑伽河。卽古所謂恆河也。右繞池而
流入東南海。南有金象口。出信度河。卽古辛頭河也。
右繞池而流入西南海。西有瑠璃馬口。出縛芻河。卽

古博叉河也。如上繞池入西北海。北有頗胝師子口。出徙多河。卽古私陀河也。如上繞池入東北海。案河圖云崑崙山東方五千里名曰神州。亦名赤縣。又依書云何源東北流出蔥嶺岐沙谷。分爲兩水。東北支流經于闐南山於國西北出。又東流大河經竭盤陀城東南。又經疎勒國西。又東北至城下。又迴流國南五百餘里至烏鎩國南。又東北至疎勒國北。六百一十里至烏孫界赤谷城。又東二百七十里經姑墨國南。又東六百七十里經龜茲國南。又東三百五十里經烏壘國南。此卽漢時都護所治也。西南去疎勒二

千一百一十里東南去鄯善國千七百八十五里東
北去烏耆國四百里。河又東南三百四十里經渠梨
國南。又東二百四十里經黑山國南。此東去玉門關
三千六百六十里。河又東經連城注賓城南。且末國
北合支水。河又東經婁蘭地。又東經鄯善國城南。過
東北數百里入蒲昌海。其海東面少北去玉門一千
三百里。又東北去陽關三百里。此河於蒲昌伏流南
而少西數千里。入積石山。在羌燒賞中。書云積石去
崑崙丘千七百四十里。或云伏流萬三千里。斯諸臆
說難以究詳。河出積石西南流九屈。東北合流。經析

支地是爲河曲。又東北入塞過敦煌張掖南是爲河源矣。案此實錄以尋河源窮至無熱他所方爲討極。然此池神居非人所及。又是北天雪山之域南接中土佛生之地。以處高勝故非邊矣。

五謂人者不出凡聖。凡人極位名曰輪王。聖人極位名曰法王。蓋此二王不生則已。生必居中。又山川國邑人之依報。人勝則依勝。故此二王居焉。又輪王有四。王約統四州。金輪王者則通四。有銀輪三方。除北一州。銅輪二方。除西北方。鐵輪在南。除於三方。言贍部者。中梵天音。唐言譯爲輪王。居處言四輪王通局。

乃殊住必南方也。古翻此州云好金地。謂閻浮檀金。在州北岸海中。金光浮山海上。其傍有閻浮樹林。其果極大。得神通者。方至於彼。今言此州輪王得名。兩設其致耳。又此一州四主所統。雪山已南。至於南海。名象主也。地唯暑溼。偏宜象住。故王以象兵而安其國。風俗躁烈。篤學異術。是爲印度國。然印度之名。或云賢豆。或云天竺。或云身毒。天竺等皆傳之訛僻耳。然以印度爲正。唐無以翻。雪山之西。至於西海。名寶主也。地接西海。偏饒異珍。而輕禮重貨。是爲胡國。雪山以北。至於北海。地寒宜馬。名馬主也。其俗兇暴。忍

殺衣毛是突厥國雪山以東至於東海名人主也地
唯和暢俗行仁義安土重遷是至那國卽古所謂振
旦國也。上列四主且據一州分界而王以州定中輪
王爲正居中王邊古今不改。此土諸儒滯於孔教以
此爲中餘爲邊攝別指雒陽以爲中國乃約軒轅五
岳以言未是通方之巨觀也。又指西蕃例爲胡國然
佛生遊履雪山以南名婆羅門國與胡隔絕書語不
同故五天竺諸婆羅門書爲天書語爲天語謂劫初
成梵天來下因味地脂便有人焉從本語書天法不
斷故彼風俗事天者多以生有所因故也胡本西戎

無聞道術。書語國別傳譯方通。神州書語所出無本。且論書契可以事求伏羲八卦文。王重之蒼頡鳥迹。其文不行。漢時許慎方出說文。字止九千以類而序。今漸被世。文言三萬。此則隨人隨代會意出生。不比五天書語一定。

上以五義以定中邊。可以鏡諸餘。如隋初魏郡沙門靈裕聖迹記述。

遺迹篇第四

自漢至唐往印度者。其道眾多。未可言盡。如後所紀。且依大唐往年使者。則有三道。依道所經。具覩遺迹。

卽而序之其東道者從河州西北度大河上曼天嶺
減四百里至鄯州又西減百里至鄯城鎮古州地也
又西南減百里至故承風戍是隋互市地也又西減
二百里至清海海中有小山海有七百餘里海西南
至吐谷渾衙帳又西南至國界名白蘭羌北界至積
魚城西北至多彌國又西南至蘇毗國又西南至敢
國又南少東至吐蕃國又西南至小羊同國又西南
度咀倉去關吐蕃南界也又東少南度末上加三鼻
關東南入谷經十三飛梯十九棧道又東南或西南
緣葛攀藤野行四十餘日至北印度尼波羅國

此國土吐

蕃約為九千里

其中道者從鄯州東川行百餘里又北出六百餘里
 至涼州東去京師二千里從涼州西而少北四百七
 十里至甘州又西四百里至肅州又西而少北七十
 五里至故玉門關關在南北山間又西減四百里至
 瓜州又西南入磧三百餘里至沙州又西南入磧七
 百餘里至納縛波故國即婁蘭地亦名鄯善又西南
 千餘里至折摩陀那故國即咄末地又西六百餘里
 至都羅故國皆荒城耳又西入大流沙行四百餘里
 至瞿薩咀那國東境

即漢史所謂于闐國也。都護所居漢之所守。東去長安九千六

百七十里。其關名尼壤城。彼土自謂于遁國也。周四千餘里。沙磧大半。寺有百餘僧。出五千大乘學者。從關至媯摩川二百餘里。有媯摩城。中有栴檀立像高二丈餘。極多靈異。光明疾者隨痛以金薄帖像上便愈。其像本在憍賞彌國。是鄔陀衍那王所造。凌空至此國。北曷勞落迦城有異羅漢。每往禮之。王初不信。以沙土塗羅漢。乃告敬信者曰。卻後七日沙土滿城。於後二日乃雨。寶滿街。至七日夜果雨。土填城略無遺人。其先告者預作地穴。從孔而出。東趣媯摩像亦同至。有記云。法滅之時像入龍宮也。其曷勞城今爲大埕。

王欲掘寶必遭風變。又於媿摩城西行三百三十里。方至國城王都。南十里有大寺。先王所立。西南十餘里。寺有綖紵立像。從屈支國來。昔此有臣於彼禮敬。臣還本國。遙念無已。像遂夜至。乃捨宅爲寺。都城西三百餘里。勃伽夷城有坐像高七尺。相好無比。首有寶冠。光明時現。都城西百六十里。路中大磧。唯有鼠壤。形大如蝟。毛金銀色。昔匈奴來寇。主祈鼠靈。乃夜齧人馬兵器。斷壤自然走退。都城西五里許。寺有浮圖高百餘尺。多現光相。主感舍利數百粒。羅漢以右手舉浮圖。安之函內。乃下之。無傾動也。都城西南十

餘里有瞿室餒伽山

此云牛角

有寺像現光明佛曾遊此

爲天人說法。記其建國崇學大乘。山巖石室有一羅

漢入滅心定待慈氏佛數百年前崖崩塞戶。其國南

界接東女國。從國城西越山谷行八百餘里至斫句

迦國

卽沮渠也

南境。其國周千餘里。佛寺十餘。僧徒出百

學大乘者。國南有山立多羅塔。松泉流茂石室深淨。

有三羅漢現入滅定。鬚髮恆長。僧常剃之。五印度僧

有證果者多。止此室。又北減三百里。方至都城。周十

餘里。山阜連屬。臨帶兩河。又於國西北上大沙嶺。度

徙多河五百餘里。至佉沙國。

卽疎勒也

周五千餘里。寺數

百僧數萬習小乘有部地多石磧其俗生子押頭匾
匾從此南行山野石磧五百餘里至烏鏃國周千餘
里都城周十餘里南臨徙多河信佛法寺十餘所僧
減千人習小乘學城西二百餘里至大山嶺上有塔
數百年前山崖自崩中有比丘冥目而坐形甚偉大
鬚髮下垂覆於肩面國王以酥油灌之擊犍槌比丘
高視曰我師迦葉波也今始乃聞已涅槃耶又聞釋
迦佛出世耶告云已滅度矣卽昇空化火焚身其土
出白鑿青玉等從國城西度河登蔥嶺東崗八百餘
里至福舍其地在四山之中方百餘頃無樹木有細

艸緣如別說。又西南踰大嶺至竭盤陀國。周二千餘里。都城周五十餘里。北背徙多河。敬佛法寺十餘僧。五百餘人。小乘有部。其國東南大石室二口。各一羅漢。入滅心定。經七百餘歲。其鬚髮生年別爲剃。又西北行三百餘里。方至王都。東南臨徙多河山嶺。連屬。又西少南登山。冰雪五百餘里。至波謎羅川。東西千餘里。南北百餘里。或狹無十里。據南北大雪山間地。鹹鹵多石。草木希少。絕無人住。川南越山有鉢露羅國。此川在大蔥嶺上。瞻部一州地最高也。中有大龍池。東西三百餘里。南北五十餘里。大卵出焉。其水西

流至達磨悉帝國東界與縛芻河合。故此已西水竝西流。東出一流。東北至佉沙國。西界與徙多河合。自此諸水皆東流也。龍池正南。當無熱池。北當千泉川。南當池大嶺。名婆羅犀羅。南北三四百里。山地極高。池北卽大蔥嶺也。水經云。高可千餘里。兩邊漸下。南北豎嶺行數極多。百餘條矣。多有山蔥崖峽。蔥翠因以名焉。嶺南接大雪山。北至千泉。應有二千五百許里。東極烏鐮。西達活國。應三千餘里。又從川西南入山。險七百餘里。至商彌國。周二千六百里。土出雄黃。國人信佛。寺有二所。僧亦少耳。北越達磨悉帝大石。

山至尸棄尼國。周二千餘里。山磧連野。又南越山河。

至達摩鐵悉帝國。

一名護伽國。一名護密國。

卽覩貨羅之故地也。

在兩山閒。東西一千五百里。南北減百里。或狹不踰十里。東臨縛芻河。寺有十餘僧。數蓋少。城寺石像上。懸金銅圓蓋。眾寶飾之。人有旋繞蓋亦隨轉。人止便止。四周石壁莫測其然。有說聖力使之。或謂機關之祕。又西南登山入谷五百餘里。至屈浪拏國。亦故地也。周二千餘里。少有信向。又西北踰嶺三百餘里。至淫薄健國。亦故地也。周千餘里。都城十餘里。又西北山谷行二百餘里。至鉢鐸。創那國。亦故地也。周二千

餘里。都城山崖上。周六七里。寺有四所。僧亦少耳。山谷西行二百餘里。至咽摩阻。羅國亦故地也。周三千餘里。山川相半。堅城數十。西越山谷三百餘里。至訖栗瑟摩國。亦故地也。東西千餘里。南北三百里。都城周十五里。北至鉢利曷國。亦是故地。廣百餘里。南北三百餘里。都城二十餘里。又從訖栗國西越峻入洞。經川城三百餘里。至曹健國。亦是故地。周四百餘里。都城周十六里。北度河至阿利尼國。亦故地也。周三百餘里。帶縛芻河兩岸。大城周十五里。東渡河至遏羅胡國。亦故地也。北臨前河。周二百餘里。大城周十

五里。又從曹健國西行百餘里。出葱嶺西頭也。尋山而下。至於活國。亦西故地。周二千餘里。王城周二十餘里。其王突厥也。鐵門已南。諸小國多屬突厥地。安平俗多信佛。寺十餘。僧數百。大小兼學。西至縛曷國。四五百里。東南越山谷。諸城三百餘里。至闊悉多國。亦是故地。國周減千里。都城十餘里。山多川狹。極甚風寒。僧寺三所。眾亦少耳。東南入谷。越嶺度諸小城。四百餘里。至安阻羅縛國。亦是故地。周三千餘里。王城周十五里。屬突厥。寺有三所。僧有數十。有育王一塔。山阜連屬。極寒厲也。從此西南上大雪山。婆羅犀

羅嶺東頭。經三日行。又至極頂。通望瞻部一州。諸山
竝皆四下。又尋嶺下行。亦三日。極峻曲谷。鑿冰而度。
西經迦畢式國。邊城小邑數十。又西南數百里。方至
王都。又西少南一千三百里。越山川至弗栗恃薩儻
那國。廣二千餘里。南北千餘里。王城周二十餘里。信
佛法。從此南行五百餘里。至漕矩吒國。亦曰早利周七千
餘里。王城周三十餘里。山川相半。寺有百數。僧徒數
萬。皆學大乘。育王塔十所。天祠數十。計多外道也。土
宜鬱金香艸。出興瞿艸。生羅摩。印度川南境。耨那。呬
羅山。王城東南二千餘里。至西印度。伐刺拏國。方合

北道南趣佛國。

其北道入印度者。從京師西北行三千三百餘里至瓜州。又西北三百餘里至莫賀延磧口。又西北八百餘里出磧至柔遠縣。又西南百六十里至伊州。又西七百餘里至蒲昌縣。又西百餘里至西州。卽高昌故地。漢時宜禾都尉所治處也。後沮渠涼王避地於彼。今爲塞內。又西七百餘里至阿耆尼國。卽烏耆也東西六百餘里。南北四百餘里。都城周六七里。僧寺十餘二千餘人。竝學小乘。說一切有戒行精勤。食三淨肉。從此黑嶺胡類羣分。重財輕義。無禮無敬。婦尊夫卑。良

賤一等。吉素凶。阜以爲制服。又西南行二百餘里。踰

一小山。越二大河。川行七百餘里。至屈

居勿反

支國

丘卽

也。東西千餘里。南北六百里。城周十七八里。寺有百

餘僧。五千餘。竝學小乘。說一切有。如上。三淨俗。大信佛。王城民宅多樹像塔。不可勝記。東境大城中有天祠。池龍時出。與牝馬合而生龍駒。初生。懼。候子方馴。駕故國多善馬。近王名金華者。感龍駒。乘王欲終時。鞭觸其耳。因卽潛隱。與人婦通生子。驍勇。王搆突厥。殺此城人。故令空荒。城北四十餘里。東昭怛釐寺。佛堂中有玉石方二尺。上有佛足迹。長尺八寸。廣六寸。

齋日放光。王城西門外路左右有立佛各高九十餘尺。於此建場五年一會。西有阿奢理貳寺。唐言奇特也。昔王外遊觀禮聖迹。母弟畱守。因自割勢爲防讒。構王深異之。弟後遇人犍五百牛。遂愍贖之。慈善根力。男形欵生。遂不入宮。王訝奇特。故因置寺。又西經小磧六百餘里。至跋祿迦國。古名姓墨。又名函墨。東西六百餘里。南北三百餘里。王城周五十里。寺數十所。僧千餘人。竝小乘學。西北行三百餘里。度石磧。至凌山。卽葱嶺北原也。水多東流。此路不得赭衣持瓠及聲叫。有犯者。龍能飛風雨沙。遇必皆沒。山行自西四百餘里。

至大清池

又名熱海。亦名鹹海。

周千餘里。東西長。四面有山。行

人祈福。又西北五百餘里。至素葉水城。周六七里。商

胡雜居。已西數十孤城。亦爾。又西四百餘里。至千泉

泉涌。多出方二百餘里。南面雪山三垂。平陸。又西百

五十里。至阻邏私城。又西南二百餘里。至恭敬城。又

南五十里。至笈

奴故

赤建國。周千餘里。又西二百餘里

至赭時國

唐言石國

周千餘里。西臨葉河。又東南千餘里

至悚

敷世

捍國。周四千餘里。山周四境。又西行千餘里

至率覲利瑟那國。周千四百里。東臨葉河。葉河出蔥

嶺。北西北流。又西北入大磧。應五百餘里。至颯末建

國唐言周千六百餘里南北狹都城周二十餘里處

極險固自此東南至弭末賀國米國也周繞四五百里

東西狹又西北至劫布咀那國曹國也周千四五百里

東西長又西三百餘里至屈霜爾迦國何國也周同曹

國而東西狹又西二百餘里至喝捍國東安國也周千餘

里又西四百餘里至捕捍國中安國也周千七百餘里東

西長又西四百餘里至伐地國西安國也周四百餘里又

西南行五百餘里至貨利習彌國順縛芻河兩岸東

西可三十里南北五百餘里又從颯祿建國西南行

三百餘里至羯霜那國云史國也周可千五百里又西南

二百餘里入大山山路絕險又少人物東南山行三百餘里至鐵門關左右石壁其色如鐵鐵固門扉懸鈴尙在卽漢塞之西門也出鐵門關便至覩貨邏國

古云吐
出羅也

之故地南北千餘東西三千餘東拒蔥嶺西

接波斯南大雪山北據鐵門縛芻大河中境西流其中自分二十七國僧以十二月十六日安居由溫熱多雨故也順河北下至阻蜜國東西六百餘南北四百餘王城周二十餘里寺十數僧出千人大有窳覩波

卽古塔之別
名如偷婆等

佛像靈異又東至赤鄂衍那國東西

四百里南北五百餘王城周十餘里寺五所僧少又

東至忿露摩國東西百餘南北三百餘主城周十六
七里寺有二所僧百餘耳東至愉用俱漫國廣四百餘
里從百餘里主城周十餘里寺二所僧亦不多西南
臨縛芻河便至鞠和衍那國廣二百餘里從三百餘
里主城十餘里寺三所僧百餘又東至鑊沙國廣三
百餘里從五百餘里主城周十六七里又東至珂咄
羅國廣從千餘里主城周二十餘里南接蔥嶺至拘
謎陀國廣二千餘里從二百餘里據大蔥嶺之中主
城周二十餘里西南臨縛芻河國南接尸棄尼國南
度此河至達摩悉帝等國如前中道所引也又從鐵

門南而少東五百餘里至縛喝國。一道拘謎西南至
嚩伽浪國廣五十餘里。從二百餘里。都城十餘里。又
南至紇悉露泯健國。周千餘里。城都周十五里許。又
西北至忽懍國。周八百餘里。都城周十五里餘。寺十
餘僧五百。又西至嚩喝國。廣八百餘里。從四百餘里。
北臨縛芻河。王城周二十餘里。俗美其國。詔爲小王
舍城。寺有百餘僧。二千餘人。竝小乘學。城外西南有
納縛此云新也寺。在雪山北。作論諸師贊重。此寺基業不
替。像鑿名珍。毗沙門像衛之。突厥葉護欲襲寺。取寶
屯軍寺側。夜夢天王長戟貫胸。可汗心痛。因爾便死。

堂中有佛澡罐受可升餘雜色炫耀金石難名又有佛牙長寸餘廣八九分色黃白而光淨佛掃帚者用迦奢艸長二尺餘圍可七寸雜寶飾柄三物齋日法俗所感放大光明有大浮圖高二百餘尺金剛泥塗以寶莊之有佛舍利時放神光又諸羅漢入涅槃者示通立塔雖有通果不現通者則不封樹王城西北五十餘里有提謂城王城正北四十餘里有波利城各有浮圖高三丈許卽釋迦開元獻妙長者髮爪之所建也佛以僧伽胝鬱多羅僧僧卻崎又覆鉢豎錫杖次第安布立塔儀式令依崇建王城西七十里迦

葉波佛時所建浮圖高二丈餘。又從大城西南入雪山河三十餘里。至銳末陀國。廣五六百里。從百餘里。王城周十餘里。又西南行三百里。至胡寔建國。廣五百餘里。從千餘里。王城周二十餘里。多山川。又西北至坦刺健國。廣同前。從五十餘里。王城十餘里。西接波刺斯國界。又縛喝國東至忽懍國。於此東南至紇露悉泯健國。千餘里。於此北近縛伽浪國。東西五十餘里。此國東北接活國。又從縛喝國南百餘里。至揭職國。廣五百餘里。從三百餘里。都城周五里許。寺十餘僧。三百餘人。並小乘學。陵阜相連。東南入大雪山。六

百餘里出覩貨羅故地。又至梵衍那國。廣二千餘從。三百餘里。在雪山中城。依巖險。寺有數十僧數千人。學小乘出世部。王城東北山阿有大石佛。高一百五十尺。金寶莊嚴。又東寺左有鍤石釋迦立像。高百餘尺。分身別鑄。合成立之城。東三里寺有涅槃臥塑佛。長千餘尺。亦金寶莊之。東南二百餘里。度大雪山。東寺有佛齒及劫初獨覺齒。長五寸餘。廣減四寸。又有金輪玉齒。長三寸。廣二寸。又有商諾迦縛娑即商那和修傳。法第三師。大阿羅漢鐵鉢。受九升許。竝九條僧伽胝絳赤色。設諾草皮之所績成。以其先世於解夏日持此艸。

施僧福力所被五百中陰身生恆服之從胎俱出遂身而長阿難度時變爲法服受具已後又變爲九條其齒鉢等竝金緘之羅漢證滅人邊際定智願力故畱袈裟待遺法盡方乃變壞今已少損信有徵矣大雪山東至小川澤東入雪山踰黑嶺至迦畢試國周四千餘里北背雪山三垂黑嶺都城周十餘里寺有百餘僧六千餘人多學大乘其王信佛歲造丈八銀像自修供之天嗣數十異道千餘人王城東三里北山下有大寺佛院東門南大神王像右足下有六寶藏近有外王逐僧欲掘神冠中鸚鵡鳥像奮羽嗚呼

地動。王軍皆仆起謝而歸。寺北嶺上有數石室亦多藏寶。欲私開者藥又變爲師子蛇蟲來震怒之。室西三里大嶺上有觀自在像。誠願者像示妙身安言行者。城東南三十餘里曷邏怛羅寺。大臣所造以名目之。浮圖高百餘尺。昔臣夜夢令造浮圖。從王請舍利也。及旦至宮有人持舍利瓶。臣畱舍利令人先入。乃持瓶登塔覆鉢自開。安舍利訖。主使追之石已合矣。齋日放光流出黑油。夜聞音樂。城西北二百餘里大雪山頂有龍池。山下爲龍立寺。塔中有佛骨肉舍利。升餘有時烟起。或如火猛燄。漸滅之時方見舍利狀。

如白珠繞柱入雲還下塔中。城西北大河南岸古王
寺中有佛弱齡亂齒長一寸餘。又此東南往古王寺
有佛頂骨一片廣寸餘色黃白。髮孔分明佛髮青色
螺旋右縈引長尺餘卷可寸許。又西南古王如寺金
銅浮圖高百餘尺。佛舍利升餘。每十五日夜放光繞
盤曉入塔中。城西南比羅婆絡山。云象堅也頂盤石上起
塔高百餘尺。舍利升餘。山北岳泉是佛受山神飯已
漱口嚼楊枝。因生今爲茂林。寺號楊枝也。

釋迦方志卷第一

釋迦方志卷第二

唐終南太一山釋道宣撰

又從龍池東行六百餘里越雪山度黑嶺至北印度界已前諸邑並名胡國至此方合中間道也其地名

曰濫波國

北印度所攝也入天竺婆羅門地也

其五印度之境周而九

萬餘里三垂大海北背雪山北廣南狹如半月也七

十餘國同一王命濫波國者在無熱池西倚北胡活

國東南三垂黑嶺北繞雪山都城周十餘里寺十餘

僧數亦少多學大乘天祠數十異道特多東南百餘

里踰大嶺大河至那伽羅曷國

屬北印度古華氏城

廣六百餘

里長二百餘里。山周四境。都城周二十餘里。寺多僧少。天祠五所。異道百人。城東二里有石塔。高三百尺。編石特起。雕鏤非常。此卽昔時值然燈佛敷鹿皮衣。布髮掩泥之地也。經劫猶存。無憂王重法建此石塔。以誌之。每於齋日。天輒雨華。大眾集觀。西有佛寺。次南小塔。是掩泥處。主避大路。遂僻建立。城內大塔。故基舊有。佛齒別塔。高三丈餘。云從空來。旣非人工。寔多靈異。城西南十餘里有塔。是佛自中印度陵空來降迹處。次東有塔。是昔值然燈佛買華處。城東南二十餘里。小石嶺上塔。高二百餘尺。西南深澗瀑布飛。

流懸崖。東岸石壁大洞穴。是龍王所居。門徑狹闇。昔佛於此化龍。畱影煥若眞形。至誠請者。乃暫明現。窟外方石。有佛足跡。輪相發光。窟西北隅塔者。佛經行處。又側髮爪塔。又說蘊界塔。窟西大盤石。上有濯袈裟文。城東南三十餘里。有醯羅城。四周險固。中有重閣。上安佛頂骨。周尺二寸。其色黃白。髮孔分明。欲知善惡。香泥印之。隨心而現。有佛髑髏狀如荷葉。色同頂骨。有佛眼睛大如柰許。清白映徹。並七寶小塔。盛前三迹。又以寶函盛而緘封。有佛大衣。細氈黃色。置寶函中。微有壞相。有佛錫杖。白鐵作環。梅檀爲筭。寶

筒盛之。近王恃力將入宮中尋復故處。斯五聖迹。王令五淨行者執侍掌護。有須見者稅一金錢。請仰稅五科寶。乃重觀禮彌繁。閣西北塔小而多靈。人以手觸其上。鈴震動。自此東南山谷中行五百餘里。至健陀羅國。北印度也。廣千餘里。長八百里。東臨信度河。都城周四十餘里。少空荒。寺有十餘。天祠百所。異道雜居。城內東北故基。是佛鉢寶臺。經數百年。今在波斯王宮供養。城東南八九里。卑鉢羅樹高百餘尺。枝葉蒙密。昔四佛坐下。見有坐像。傳云賢劫諸佛皆坐其下。昔釋迦如來於此坐。已告阿難曰。後迦膩色迦王集

吾骨肉在此。王後在南建塔基周一里半。金銅相輪二十五重。或云四十層者。舉高五百五十尺。有舍利一斛。初有化牧牛人林閒造三尺小塔。王擲棄之。乃於大塔第二級下石基之側半現小塔。疾者歸愈。其大塔東面石陛上昔有金色蟻大如指如麥相從。嚙石壁文如鏤。厠以金沙作二加趺佛像高四尺六寸。又於南面石陛畫佛丈六之形。昔有二貧人各施一金錢共畫一像。請現神變像卽現胸以上分爲兩身。下合爲一。次南百餘步白石佛像高一丈六尺。面北放光夜出繞塔。賊欲盜物像出迎之。賊退像還。大塔

左右小塔數百。莊工極巧。香音兩異。仙聖旋繞。佛記
此大塔七燒七立。佛法方滅。已燒至三。今現營構。西
有故寺。並前王所立。諸大論師。世親菩薩。如意論師。
脇尊者等。造毗婆沙處。寺東北五十餘里。渡大河。至
布羯邏伐底城。周十四五里。東有四佛說法塔。無憂
王建之。高數百尺。彫鏤希世。城北五里。故寺東塔高
數百尺。卽菩薩捨千眼處。東有石塔。高百餘尺。梵釋
初作妙珍瑩飾。佛滅寶變。今爲石也。又西北行五十
餘里。塔者是佛化鬼子母處。又北五十餘里。塔者是
商莫迦菩薩。此云被王射處。又東南約二百里。跋魯

此云

被王射處。又東南約二百里跋魯

沙城北東二十餘里。彈多落迦即檀特也山嶺上塔是蘇

達拏云善牙也棲隱之所。婆羅門捶男女處。流血塗地。今

諸艸木皆同絳色。巖間石室。如習定處。又西北行百

餘里。越小山至大山南。有一塔。僧學大乘。昔獨角

大仙為女亂處。沙城東北五十里。大山有大天祠。祠

東南行百五十里。至烏鐸迦漢茶城。周二十餘里。南

臨信度河。從此城北越山行六百里。至烏仗那國。北印

度之正國也。古謂烏長。山谷相連。周五千里。昔輪王苑也。土宜

鬱金香。夾蘇婆率堵河。王城周十四五里。寺有一千

四百僧。有一萬八千。並大乘學。今多荒少。其習大乘

統文略義律儀傳訓有五部焉。一法密部。二化地部。
三飲光部。四說一切有部。五大眾部。天祠十餘。異道
雜居。王都曹揭釐城。其東五里大塔多瑞。是佛昔作
忍仙爲羯利。此云鬪諍王支解之處。城東北二百六十里。
入大山至阿波羅龍泉。卽前河源也。派流西南。春夏
合凍。晨夕飛雪。佛昔化暴龍。金剛以杵擊崖。龍怖歸
依。請佛放雨。乃許之。令人收糧。十二年一雨水災。又
泉西南三十餘里。水北岸大石上。佛伏龍已畱迹。示
之。隨心長短。順流三十餘里。有佛濯衣石。袈裟文如
鏤。城南四百餘里。醯羅山谷。尋水逆流。東上華果緣。

崖或聞誼話音樂聲方石相接是佛昔聞半偈捨身

處城南二百餘里大山側有摩訶伐那寺此云大林佛昔

為薩縛達羅王即一切施也失國避地為貧人故令縛送

處寺西北下山四十餘里有寺塔高百餘尺側方石

上佛足迹相放光照寺為天說本生處塔下有石黃

白津膩是佛昔為聞法析骨寫經處又西七十里塔

是佛昔為尸毗迦王此云聳也割身代鴿處又西二百餘

里珊尼羅闍川薩哀殺地言蛇藥也寺塔高八十尺佛昔

為帝釋身作大蟒僵死以施貧疫處側有蘇摩塔是

佛變為蘇摩蛇噉者病愈處川北崖塔病求多愈又

側有涌泉。佛昔為孔雀王。紫啄而出。用救疾處。城西

南七十里。大河東塔高六十尺。是唵咀羅犀那。言上軍也

王所造。佛令以舍利與王。分在河濱立塔。王以白象

負歸。象變為石。城西五十餘里。渡大河有盧醯咀迦

塔。言赤也高五十餘尺。佛昔為慈力王。刺血飲五藥。又

處。城東北三十里。遏部多。言奇特也石塔高四十尺。佛為

人。天說法。塔從地出。現即存焉。又西渡大河四十里

寺。精舍有阿縛盧枳抵。云觀也伊溼伐羅。云自在也菩薩像。

即觀世音者威靈遠照。此西百五十里。山嶺龍池。周三十

餘里。王城東北踰山谷。逆上信度河。途路極險。乘纏

棧梁鎖杙躡墜千有餘里至達麗羅川烏仗那舊所

都也大寺中有刻木梅呾麗耶

古云彌勒唐言慈氏

菩薩像金

色晃朗高百餘尺末田底迦

即末田地

阿羅漢所造以通

力引匠升觀史多

即兜率也

天三返觀相乃成其好自有

此像法方東流也東行越嶺逆信度河履險飛梁五

百餘里度河又東渡縛芻河登危至鉢露羅國周四

千里大雪山中東西長寺數百僧數千學師戒行多

濫其國非印度所統多冰雪其土出金如火色北對

婆羅犀羅大嶺還從健馱邏國烏鐸迦城南渡信度

河廣四里許西南流清澄如鏡毒龍惡獸窟穴其中

有持舍利寶華者船多沈沒。度河至阻。又始羅國。

北

度

也。周二千餘里。都城周十餘里。寺多僧少。並大乘學。

城西北七十餘里。有伊羅鉢龍池。周百餘步。池東南三十里。兩山間塔高百餘尺。佛昔記慈氏興世四大藏者。此地出一。故有振動斯周百步。曾無一搖。有欲發者。地振人仆。城北十二里塔。於齋日常放神光。仙華天樂。近有癩者。於塔禮懺。除穢塗香。不久便愈。身又香潔。昔佛爲戰達羅鉢刺婆王。云月以頭施處。凡經千施。卽塔名月光也。城東南山塔高十丈許。抉目王所治。育王爲造。又東南越山谷七百餘里。至僧伽

補羅國

北印度也

周三千五百里西臨信度河大城周十

四五里城東五十里有石塔高二十餘丈佛所遊處

池沼十餘四色蓮華彌覆其內從此南返至咀又始

羅國北界渡信度河東行二百餘里度大石門是摩

訶薩埵王子捨身飢虎處東有寺僧百餘又南百五

十里石塔者薩埵以竹自刺血陷獸處地及艸木今

猶絳色次北石塔高二十餘丈放光開信病歸多愈

又東五十餘里孤山有寺塔高二百餘尺僧徒二百

人並大乘學佛昔化藥又不食肉處又東南山行五

百餘里至烏刺尸國

北印度也

周二千餘里山阜相屬都

城周十八里不信佛法屬迦溼彌羅有佛塔高二十

餘丈育王所造有寺僧少學大乘教又東南登山鐵

橋千餘里至迦溼彌羅國北印度也古曰罽賓周七千里四面

負山雖有門徑狹而劣通城西臨大河長十三里廣

四里許寺百餘僧五千餘人土出龍種馬鬱金火珠

有四浮圖各有舍利一升餘佛滅後第四百年脇尊

者年八十方出家證無學將五百羅漢來此造十萬

頌鄔波弟鑠論即優婆提舍釋素旦纜藏修多藏異名也次造十

萬頌毗柰耶毗婆沙論次造十萬頌阿毗達磨論凡

六百六十萬言備釋三藏新城東南十餘里故城北

大山陽寺塔。僧徒三百人。佛牙長寸半。色黃白。齋日便放光。又南十五里有觀自在菩薩立像。有願見者斷食便覩。王城西北二百餘里。至商林寺。城西百五十里。大河北接山。有寺僧百餘人。從此西南越山行七百餘里。至半斂蹉國。北印度度屬罽賓周二千餘里。寺有五所。多山川。東南行四百餘里。至遏邏闍補羅國。非正度乃荒服國也周四千餘里。都城周十餘里。寺十所。僧甚少。天祠一。外道甚多。自濫波達此。形體鄙薄。非印度之正境也。從此下山。東南行。並是大川。迴遠無畔。唯以河國而分界。部雖有小山。並是孤住。自此以北通連

雪山東達神州涼部以南諸雪山也。案此山亦卽贍部之巨鎮地者。於此城東南下平渡水行七百餘里至磔迦國。北印度也周萬餘里。東據毗播奢河西臨信度河。都城周二十餘里。俗少信佛。多事天神。寺有十餘天祠數百。城西南十五里奢羯羅故城。寺塔高二十餘丈。昔四佛說法經行處。又西北六里許塔高二十餘丈。亦四佛說法處。新都城東北十餘里石塔高二十餘丈。多有舍利。齋日放光。東行五百餘里至那僕底國。北印度周二千餘里。都城周十四五里。寺十天祠八。城東南五百餘里。至闍林寺。周二十餘里。佛舍利

塔數百千區并石室等僧有三百人。學小乘說有部也。德行清高。小學之博賢。劫千佛並此說法。釋迦滅後第三百年。迦多衍那迦延於此造發智論。寺塔高二十餘丈。有四佛行坐迹。處從此東行百五十里。至闍爛達那國。北印度也。東西千餘里。南北六百里。都城周十餘里。寺有五十。僧二千餘人。大小專門。天祠三所。外道五百人。東北越山七百餘里。至屈露多羅國。北印度也。山周四境。都城周十四五里。寺二十餘。僧千餘人。多大乘學。天祠十五。異道雜居。出火珠。兩石。俗癩且。燼城內有塔。記佛曾遊於此。說法自斯北行近二千

里山路危險。至洛護羅國。北印度也。又北山行二千餘里。

雪寒更甚。達秣羅娑國。又名三波訶。北印度攝。又從窟露羅南

行七百餘里。越山濟河。至設多圖盧國。北印度也。周二千

餘里。西臨大河。都城十七八里。佛法大盛。城內外寺

十所。僧亦少耳。城東三里塔高二十餘丈。育王所造。

傍有四佛行坐迹。自此西南行八百餘里。至波狸夜

但羅國。入中印度也。周三千里。都城周十五里。寺有八所。

僧亦少耳。俗信外道。天祠十所。異道千餘。土有稻種。

六十日收。東行五百餘里。至秣菟羅國。中印度也。古云摩偷羅。

周五千餘里。都城二十餘里。寺二十餘。僧二千餘人。

大小兼學。天祠五所。異道雜居。土植菴沒羅果。小者

生青熟黃。大者始終青色。城中三塔。四佛遺迹甚多。

及舍利子沒特伽羅子。謂目乾連也。滿慈子。富婁羅也。優婆釐

優波離也。阿難陀羅怙羅曼殊室利等諸塔。每三長月六

時。諸僧尼集阿毗達磨眾。供養舍利弗塔。習定眾。供

目犍連塔。誦經眾。供滿慈塔。毗奈耶眾。供優波離塔。

尼眾。供阿難塔。未具眾。供羅怙羅塔。大乘眾。供諸菩

薩塔。尋斯諸塔。不必遺身。但立像設。供用呈心。造如

羅怙文殊。未取滅度。則可知矣。城東六里有山崖寺。

是尊者烏波邠多。云近護也。之所造也。有佛指爪塔。寺北

石巖室高二丈廣三丈細籌四寸填之近護導夫妻
 俱證羅漢者送一籌乖此不在室記又室東南二十
 餘里大澗池側有塔佛曾遊此有獼猴持蜜施佛佛
 令水和徧眾同飲猴喜墮坑而死便生人中池北林
 中四佛經行處大有遺迹又東北五百餘里至薩陀
 泥溼伐羅國中印度也周七千餘里都城周二十餘里寺
 有三所僧七百人皆小乘者天祠百餘異道甚多城
 西北四里塔高二十餘丈舍利一升時放大光城南
 百餘里至佛寺又東北四百餘里至率祿勒那國中印
 度周六千餘里少荒東境臨菟伽河即古恆河北接大山

城東南閻牟那河從國西北山中出中境而流都城
周二十餘里東臨閻牟河寺有五所僧千餘人多小
乘學天祠百餘異道甚多河西大寺東門外塔佛曾
於此說法度人其側有佛髮爪塔閻牟河東八百餘
里至菟伽源廣三四里東南入海廣十餘里水色滄
浪味甘沙細隨水而流俗謂福水有沐除罪或有輕
命自沈云生天受樂有僧伽羅國提婆菩薩化外道
受正法處渡河東至秣底補羅國中印周六千餘里
都城周二十餘里不信佛而敬天寺有十餘僧八百
人多小乘者天祠五十餘異道雜住國西北境菟伽

東岸摩裕羅城周二十餘里。出鎡石水精。城側臨大河。有大天祠。多有威靈。有池。編石為岸。引河為浦。五印度以為苑伽河門。生福滅罪。處常有百千人澡濯。從摩裕北行三百里。至婆羅吸摩補羅國。中印度周四千餘里。山周四境。都城周二十餘里。寺五。僧少。天祠有十。異道雜住。國北大雪山。有蘇伐刺拏瞿咀羅國。言金氏也出上黃金。東西地長。即東女國。非印度攝。又即名大羊同國。東接土蕃。西接三波訶。北接于闐。其國世以女為王。夫亦為王。不知國政。男夫征伐種田而已。又從末底補羅國東南行四百餘里。至瞿毗霜那。

國中印周二千餘里。都城十四五里。寺二所。僧百餘

人。而習小乘。天祠三十餘。異道雜住。城固險峻。其側

古寺塔高二十餘丈。佛曾於此一月說法。有髮爪二

塔。各高丈餘。旁有四佛坐迹。又東南行四百餘里。至

聖醞掣咀羅國中印。周三千餘里。都城周十七八里。

寺十餘所。僧有千餘。習小乘。正量部。天祠有九。外道

三百餘人。城依險固。其外池側佛爲龍說法。七日處

立塔。側有四佛行坐迹。立塔表之。又南二百七十里。

度菟伽河。西南至毗羅刪拏國中印。周二千餘里。都

城周十餘里。信外道。少敬佛法。寺二所。僧徒三百人。

皆大乘學。天祠五所。城中寺塔高十餘丈。佛曾於此
七日說蘊界法。四佛行坐遺迹尙存。於此東行二百
餘里至劫比他國。中印度古僧伽舍也周二千餘里。都城周二
十餘里。寺有四所。僧千餘人。天祠十所。同事大自在
天皆作天像。其狀人根形甚長偉。俗人不以爲惡。謂
諸眾生從天根生也。城東二十餘里大寺。中僧數百
人。淨人數萬頭。皆宅寺側。大垣內有天帝造三寶階
中階黃金。左以水精。右用白銀。南北而列。東面下地。
是佛從逝多林。卽祇陀林昇天善法堂爲母。三月說法下
降處。百年前階尙在今。並沒盡後王傲之。猶高七十

餘尺上起精舍側有石柱光潤映現隨其罪福影出
柱中育王所造階側浮圖四佛行坐迹也佛澡浴處
立塔其所有佛入室精舍又其側佛經行石基長五
十步高七尺足所履處皆蓮華文基左右小塔梵王
所造次前是蓮華尼化爲輪王先見佛處佛告尼曰
非汝先也有蘇部底須菩提也宴坐石室知諸法空見吾
法身次東南池有龍居焉恆護聖迹不可輕犯從此
西北行減二百里至羯若鞠闍國中印度曲女城周四千餘
里都城西近菟伽河長二十餘里廣四五里邪正相
半寺百餘僧徒盈萬大小兼學夫祠二百餘所異道

數千人卽統五印度之都王也號尸羅逸多。言戒日也吠奢姓初欲登位。菟伽岸有觀自在像。乃請之告曰。汝本此林蘭若比丘。金耳月王旣滅佛法。王當重興。愍物在壞。方王五境。慎勿昇師子座。及稱大王號也。王乃共童子王平殄外道。月王徒眾。又約嚴令。有噉肉者。當截舌殺生。當斬手。乃與寡妹共知國事。於菟伽側。建千浮圖。各高百餘尺。城邑鄉聚。達巷交衢。立精舍。儲食止醫藥。惠羈貧。聖迹之所。皆爲立寺。二十年來。五年一會。傾及府藏。拯濟羣有。唯畱兵器。用備不虞。初作會日。集諸國僧。三七日中。四事供養。令相論

議若戒行貞固道德優洽者昇師子座王便受戒清
淨無學示有崇仰穢行彰露者驅出國界諸有王臣
植福無怠者攜手同坐異此不顧王巡省方俗不常
其居行必四兵導引嚴設汎舟乘象擊鼓吹螺象軍
八萬以威四遠唯兩三月不外遊行宮中每日飯諸
沙門僧有千人婆羅門五百日分三時一時理務兩
時營福又絕血食日例一頓於河西寺東起寶臺高
百餘尺中有等身金像次南起寶壇浴佛像處於此
東北十五里許別築行宮從寺至宮夾道爲閣窮諸
彫飾樂伎不移遞奏而已又以三尺隱起金像載以

大象寶噫其上。王爲帝釋像，執寶蓋，左侍。有迦摩縷

波國拘摩羅王。

言童子也。

作梵王像，執拂，右侍。各五百象

軍被鎧，同衛前後。各百大象樂人於上，鼓奏音聲。戒

日王又以眞珠雜寶金銀諸華隨出，四散供養三寶。

其五，印度尼寺稀少，縱有尼者，與僧同門，食亦同處。

無虧戒約。然童子王刹帝利，姓語使人李義表曰：上

世相承四千年先人神聖，從漢地飛來。王於此土，城

西北塔育王所造。昔佛於此七日說法，其側有髮爪

塔四佛行坐迹。又南臨菟伽河三寺，同垣異門。佛像

嚴麗，佛牙長寸半，光色變改寶函盛之。遠近瞻者，日

有百千守者煩撓重稅金寶而樂禮者不辭重貨齋
日便出置高座上散華雖積牙函不沒寺僧清肅淨
人數千戶寺前左右精舍高百餘尺右基甌室中像
寶莊或純金銀次東南大精舍石基甌室高二十餘
丈是佛六月說身無常苦空不淨處又有四佛行坐
迹在城東南六七里菟伽南岸上城東南百餘里有
納縛提婆城據菟伽河東岸三寺同垣異門周二十
餘里次前二百餘步塔高二十餘丈佛曾七日說法
處中有舍利時放光明其側四佛行坐迹寺北四里
臨菟伽岸塔高二十餘丈佛曾七日說法四百餓鬼

解悟生天其側又有髮爪塔次側又有四佛行坐迹

又東南行六百餘里度菟伽河南至阿輸陀國中印度

周五千餘里都城周二十餘里寺有百餘僧三千餘

人大小兼學天祠有十異道少耳城中故寺是伐蘇

畔度菩薩言世親也數十年中作大小乘論處城北五里

菟伽岸大寺中塔高二十餘丈佛為天人三月於此

說法側有佛塔四佛行坐迹寺西五里有佛髮爪塔

城西南五里大菴沒羅林中故寺是阿僧伽菩薩云無

著也夜升天宮於慈氏所受瑜伽莊嚴大乘經論及中

邊等曉為說林西北百餘步佛髮爪塔自此東行

三百餘里度。菟伽河北至阿耶穆佉國。中印度周二千

五百里。都城臨河。周二十里。寺五所。僧千餘人。習學

小乘。天祠十所。異道雜居。城東南臨菟伽塔。高二十

餘丈。佛曾三月說法處。有髮爪。青石塔有四。佛行坐

迹。又東南行七百餘里。度菟伽河南。閻牟那河北。至

鉢羅伽耶國。中印度周五千餘里。都城據兩河交。周二

十餘里。寺二僧少。天祠數百。異道特多。城西南臨閻

牟河。曲二三千。里東北流。合閻。有瞻博迦華林中塔

高十餘丈。佛曾於此降。外道處。有髮爪塔。經行迹。又

有提婆菩薩作廣百論處。城中天祠堂前大樹枝葉

蒙密食人鬼依之。左右遺骸爲積。人至祠中無不輕命上樹投下爲鬼所誘。城東兩河閒交廣十餘里。土地平塹細沙彌布。古今王豪諸有捨施莫不止焉。號大施場。戒日大王亦修此業。場東合流口日數百人自溺而死。彼俗名爲生天所也。有欲行法七日於此絕粒自沈中流。遠近相趨。乃至山獐野鹿羣遊水濱。絕食沈水。當戒日王行施之時。有二獼猴雌爲狗殺。雄者負屍擲此河中。其又自餓累日而死。自此西南大林野行五百餘里。至憍賞彌國。中印度周六千里。都城周三十餘里。寺十餘。僧三百餘人。天祠五十外道。

眾多。城內故宮大精舍高六十餘尺。刻檀佛像上懸

石蓋。卽鄔陀衍那王

古優陀延也
唐云出愛

之所造也。靈光間

起諸王以力欲舉。終莫之移。昔佛爲母上天說法。主
請曰。連神力接工。就天模相。及佛下天像。便起迎佛。
慰喻曰。方爲佛事。舍東百餘步。四佛行坐迹。佛浴室
井。今猶充汲。城內東南隅。具史羅長者宅。有佛精舍。
髮爪塔。其大塔側。又有四佛行坐迹。城西九里石窟。
佛曾遊。此伏毒龍也。側有大塔高二十餘丈。旁有佛
經行迹。及髮爪塔。病求多愈。釋迦遺法。滅在此國。貴
賤入境。自然感傷。窟東北大林中。行七百餘里。度磧

伽北岸至迦奢布羅城周十里許是護法菩薩伏外
道處塔高二十餘丈佛曾於此六月說法有經行迹
及髮爪塔自北行一百八十里至鞞索迦國中印度周
四千餘里都城周十七里寺二十僧三千人天祠五
十外道叵多城南道左有寺塔高二十餘丈佛曾於
此六年說法側有奇樹高七十尺春冬不改是佛齒
木棄而茂生諸邪見者競來殘伐尋生如故側有四
佛行坐迹并髮爪塔基角相連林池交影自此東北
五百餘里至室羅伐悉底國中印度卽舍衛也周六千餘里
都城荒毀故基周二十餘里寺數百僧徒少天祠百

餘外道甚眾。荒城故殿東基上小塔是鉢羅犀那特

多王古云波斯匿唐言勝軍也為佛造堂處。次側故基上塔是王

為佛姨母鉢羅闍鉢底古云波闍波提此云生主比丘尼造精舍

處。次東塔是蘇達多云善施也之故宅也。側有大塔是鶩

寶利摩羅言指鬘也捨邪處也。城南六里許逝多林是給

孤園太子所造寺也。今荒廢尙有石柱高七十餘尺

育王造之。輒室獨存。餘並湮沒。室中有為母說法金

像。東北有佛洗病僧塔。西北有目連舉身子衣塔。不

遠。井塔佛所汲用。又舍利弗與佛經行道說法處。並

有表塔靈藥。異香常降其所。又外道殺女以謗佛處

立塔表之。寺東百步大深坑。是調達欲毒害佛生陷處。南有大坑。是瞿伽離比丘毀佛生陷處。又南八百步大深坑。是戰遮婆羅門女毀謗佛生陷處。此三坑皆洞達無底。洪雨大注。終無停偃。寺東七十步精舍。名曰影覆。高六十尺。中有東面坐像。與外道論處。次東天祠。量同精舍。初日影西。不蔽佛舍。晚日蔭東。遂覆天祠。又東四里大澗池。是毗盧釋迦王舊云流離也陷地處。後人立塔記之。又有身子初造寺時。與外道拊處。亦立塔記。寺西北四里有得眼林。中有佛經行迹塔。其緣勝軍王挾五百賊眼。聞佛慈力。一時平復。

捨杖遂生。城西北六十里。故城是人壽二萬歲時迦
葉波佛本生處。其北有塔。卽此佛全身舍利之所育。
王造塔表之。又東南行五百餘里。至劫比羅伐窣堵
國。中印度古云迦毗羅也。周四千餘里。空城十數。並無人住。宮
城周十五里許。以甄成之。故寺千餘宮。城一。寺僧三
十餘。天祠二所。外道雜住。城內正殿基上精舍中作
王像。其側是摩訶摩耶。言大術也。夫人寢殿基上精舍作
夫人像。其側精舍中作菩薩像。神降之相。彼執不同。
上座部云。當唐國五月十五日。諸部又云。當此五月
八日。此蓋聞見之異耳。其側有仙相塔。城南有塔。是

太子搥力擲象越城墮地爲大阬處側有精舍作太子像及受業像其傍精舍是如寢處作耶輸陀羅并羅怙羅像別本云太子初夜開城北門出去又城東南隅精舍中作太子乘白馬陵空踰城處四城門各有精舍作老病死沙門像城南四里尼拘盧林塔佛得道與天人說法之所城南五十里故城中塔是人壽六萬歲時迦羅迦村馱佛本生城城東南塔卽此佛遺身也無憂王於前建石柱高三丈餘又東北三十餘里故城中塔是人壽四萬歲時迦諾迦牟尼佛本生城城東北塔卽此佛遺身也無憂王爲建石柱

銘記之高二丈餘。城東北四十餘里有太子坐樹下塔。大城西北數百千塔是誅釋子塔。有四釋子拒軍城人不受。被放出境。一爲烏仗王。二爲梵衍等王。至今不絕。城南尼拘律樹塔是佛初來見父王處。城南門外塔是擗射處。東南三十餘里是太子射矢沒地。因涌泉流俗傳箭泉病飲多愈。或持泥傳額隨苦皆愈。又東北九十里臘伐尼林。釋種浴池華水相映。其北二十五步無憂華樹。今已枯悴。佛誕處也。有說云當此三月八日者。上座部云當此三月十五日者。次東有塔二。龍浴太子處。初佛生已不扶而行。四方各

七步所蹈之處出大蓮華。既右脇生天帝衣。接四王捧之。置金凡上。凡施四塔。并立石柱表之。旁有小河東南而流。俗號油河。是太子產已天化。此地光潤。令沐以除風虛。今變水河。尙膩如油。從此東行二百餘里。荒林中至藍摩國。中印度。多空城。東南佛塔減百尺。昔初八分之一舍利也。靈光時起。側有清池。龍變爲蛇。出繞其塔。野象採華以散之。無憂王欲開龍護。不許。又東大林百餘里。大塔是太子至此解寶衣。中未尼珠。付闍鐸迦。還父王處。又東有瞻部樹。枯株尙在。有小塔。是太子以餘衣。易鹿皮處。其側塔者。剃髮處。

年自不定。或云十九二十九者。又東南野行百九十里。尼拘陀林塔高三丈餘。昔人於佛焚地收餘灰炭。於此起塔。病者祈愈。有四佛行坐迹。塔高百餘尺。左右數百小塔。又東北大林路險五百里。至拘尸那揭羅國。中印城頽荒。人物少也。因東北角塔是純陀故宅。其井猶美。營供所穿。城西北四里度阿恃多伐底河。此云有金也。近西岸娑羅林。兩林閒相去數十步。中有四樹特高。大輒精舍中作佛涅槃像。北首而臥。旁塔高二百餘尺。前有石柱記佛滅相。有云當此土三月十五日者。有部復云當此九月八日。諸部異議。

云。至今貞觀二十年則經一千二百一十二年矣。此
 依菩提寺石柱記也。或云千三百年。或千五百餘年。
 或云始過九百未千年者。精舍側有佛昔為雉王救
 火及鹿救生各立一塔。次西塔者是蘇跋陀羅言善賢也
 滅證處。次有一塔是執金剛神躡地處。次側一塔是
 停棺七日處。次側一塔是阿泥樓陀上天告母降來
 哭佛處。城北度尼連禪那河三百步塔者是佛涅槃
 般那言焚燒也處也。地今黃黑土雜灰炭。有祈感者咸獲
 舍利。次側一塔佛為大迦葉波現雙足處。次又一塔
 前立石柱刻記八國分舍利事。此西南行二百餘里

至大邑又大林行五百餘里至婆羅_女疋_斯國_{中印}

波羅奈也周四千餘里都城西臨菟河長減二十里廣六

里許人居盛滿多信外道寺三十餘僧三千餘並小

乘正量部天祠百餘外道萬餘多事大自在天根也

大城中天祠二十所天根高百餘尺城東北婆羅疋

河西塔育王造高十餘丈前立石柱碧蘇現佛河東

北十餘里鹿野寺也區界八分連垣周堵層軒重閣

僧徒一千五百人並小乘正量部有佛精舍高二十

餘丈甄龕四合節級百數皆隱起金像鍮石佛等次

西南塔高百餘尺前有石柱高七十餘尺洞澈清淨

誠感像現隨其善惡卽成道已初轉法輪處其側三塔卽昔三佛行坐處傍者諸塔五百獨覺入滅處又側一塔慈氏菩薩受記處又西一塔是佛過去爲護明菩薩於迦葉波佛所受記處次南四佛經行處長五十步高七尺青石積成上作釋迦經行像像形特異肉髻上髻髮頭抽出神而有徵寺迹極多精舍浮圖乃數百事不可具也寺西清池周二百步佛嘗盥浴次西小池佛嘗滌器次北小池佛嘗浣衣三池龍止味甘且淨有慢觸者金毗羅獸卽而害之側有方石上有佛袈裟文迹外道兇人有輕蹈者池龍輒興

風雨側有浮圖佛曾作六牙象王覓獵者被法衣故
拔牙與處側又一塔佛昔爲鳥與獼猴象相問誰大
處又大林中塔佛與調達昔爲鹿王佛代孕鹿命處
鹿野之號因而生焉寺西南三里大塔高三十丈基
峙壯麗側又一塔是五人迎佛處大林東三里塔者
佛昔爲兔與諸獸聚自知形小燒身饋之因感天帝
下讚故使月輪有兔像現寺東順苑伽河三百餘里
東至戰主國中印度周二千餘里都城臨苑河周十餘
里人盛滿寺十所僧減千人並小乘天祠二十所異
道雜居城西北寺塔佛舍利一升昔佛於此七日說

法并四佛行坐迹有慈氏菩薩像形小而威德大城
 東北二百餘里至阿避陀羯賴拏寺云不穿耳因緣北方
 僧也寺東南渡菟河百餘里至大邑河北岸那羅延
 天祠重閣甚嚴又東南三十餘里有降鬼塔半已陷
 地前建石柱高二丈餘即佛為噉人鬼說法處鬼置
 石座千數茂林清池不遠數寺皆有僧住學大乘者
 又東南渡河百餘里塔者即分舍利瓶及餘舍利也
 每齋日放光又東北渡菟伽河百五十里至吠舍釐
 國中印度古云毗舍離也周五十餘里邪正兼半寺數百現存
 五三僧少耳天祠數十露形多矣城已頽毀故基周

七十許里宮城周五里許。少人居住宮城西北六里。寺塔說淨名經處。又東身子證果塔。又東大塔。是王得一分舍利。一斛許。無憂王取九升。均造餘塔。後更有王欲開地震。遂止。西北有塔石柱高六丈。次南獼猴爲佛穿池。池西羣猴持佛鉢上樹取蜜。處池南猴奉蜜。處各有塔記。寺東北四里許塔。是淨名故宅。基尙多靈神。其舍疊。輒傳云積石卽說法現疾處也。近使者王玄策以笏量之。止有一丈。故方丈之名因而生焉。并長者寶積宅菴羅女宅佛姨母入滅處。皆立表記。寺北四里塔。佛將往拘尸城。天人送泣處。次復

一塔是佛最後觀城邑處。次南是菴羅女以園施佛處。其側一塔是佛三告阿難住壽涅槃處。又側一塔是千子見父母處。卽賢劫千佛也。東構重閣講堂。基塔時放光明。是佛說普門經處。城西北六十里大塔。是佛別粟咕婆子處。大城西北減二百里故城塔。佛說本生曾於此爲大天輪王事。國城東南十五里大塔。是七百賢聖重結集處。又南減百里大寺層臺。重起僧學大乘。四佛行坐迹。側又一塔。是佛南趣摩揭陀北顧吠舍釐城中息迹處。寺東三十里。菴伽河南北岸。各一塔。是阿難陀分身與二國處。從北岸東北

行五百餘里至弗栗恃國

北印度也人謂三伐恃

周四千餘里

東西長寺十餘僧減千人大小通學天祠數十外道眾矣故宮城中有三千家。旃伽東北岸塔高二丈餘南望長流佛度五百漁人處由捕得大魚十八頭頭各兩眼。又東北百餘里故城西塔高百餘尺佛嘗六月說法度人。又北百五十里佛髮爪塔。又西北千五百里入山谷至尼波羅國。北印周四千餘里在雪山中都城周二十餘里雜信寺及天寺極多僧二千餘人大小兼學。王純信佛城內有閣高二百餘尺。周八十步上容萬人。面別三疊疊別七層徘徊四廈刻以

奇異珍寶飾之。城東南不遠有水火邨。東一里許有阿耨波捺水。周二十步。旱澇湛然不流。常沸。家火投之。徧池火起。煙燄數尺。以水洒火。火更增熾。碎土以投。亦卽然。盡無問投者。並成灰燼。架釜水上。煮食立熟。云此水中先有金櫃。有國王將人取之。櫃已出泥人象。挽之不動。夜神告曰。此是慈氏佛冠。下生擬著不可得也。火龍所護。城南十餘里。孤山特秀。寺居重疊。狀若雲霞。松竹魚龍。隨人馴附。就人取食。犯者滅門。比者國命並從此國而往還矣。今屬吐蕃。又從吠舍南百五十里。度菟伽河。至摩揭陀國。卽常所謂摩

竭提王舍城也。

釋迦方志卷第二

釋迦方志卷第三

唐終南太一山釋道宣撰

摩揭陀國

中印度也古者訛耳

周五千餘里城少人居邑落極

多寺五十餘僧徒出萬多大乘學天祠數十異道甚

多故城在王舍城山北倚東二百四十里北臨菟伽

河周七十餘里人壽萬歲時號拘蘇摩補羅城言香

茅華宮也人壽數千歲時更因波吒釐樹名波吒釐

子城古名巴連弗者訛也故宮北石柱高數丈無憂

王作地獄處佛涅槃後第一百年有阿輪迦王

言無憂

卽頻毗婆羅王之曾孫自王舍城遷都此城重築外

郭出異種稻粒大而美光色奇異名供大人米也宮
北臨菟伽河小城千餘家現存其獄石柱南大塔寶
飾覆鉢石作欄檻卽八萬四千之一也安佛舍利一
升時有光瑞卽無憂遇近護羅漢役使鬼神所營其
側精舍中有大石是佛欲涅槃北趣拘尸南顧摩揭
故蹈石上之雙跡也長尺八廣六寸輪相華文十指
各異近爲羯羅拏蘇伐刺那言金耳國設償迦王言月也毀
壞佛跡鑿已還平文采如故乃捐菟河中尋復本處
次側有四佛行坐塔故宮北大石室卽育王爲弟所
造次有大水槽育王飯僧者宮西南小石山周巖澗

谷數十石室育王爲近護羅漢役鬼所爲。傍有石池俗名聖水。飲者病愈。山西南五塔而各數百步。育王建八萬四千塔。已尙餘五升舍利。更造此塔。靈異間起。有王將此作難陀王五藏興軍掘之地。震山傾塔。中大呼。士卒僵仆。故城東南屈屈吒阿濫摩寺。言雞園也昔有論議屈于外道。十二年來不擊犍槌。有南印度那伽闕刺樹那菩薩。此言龍猛菩薩或云龍樹來至伏諸外道。始擊犍槌。故塔名擊犍槌也。次北有鬼辯塔。馬鳴處。城西南隅。二百餘里。古寺塔中。四佛行坐跡。又寺西南百餘里。大寺僧徒千數。並學大乘。合有四院。觀閣三層。

崇基重戶。中間三精舍。金銅隱起。中有立像高三丈。左多羅菩薩。右觀自在。並鍮石鑄成。三所各有舍利。一升光相時起。寺西南百里大山上。石塔高一丈餘。佛於大磐石上入定。經宿。諸天雨華。以感慕。故起寶塔。高一丈許。今變爲石。惟遙望見煙霞止居。靈聖龍蛇窟穴。鷲鳥猛獸。古今無人達者。山東崗塔佛於此。立觀摩揭國處。山西北三十餘里。山寺負嶺。疏崖置閣。大乘學瞿摩末底菩薩。唐言德慧。伏外道處。今有僧五十餘人。又西南二百餘里。孤山寺。有論師尸羅跋陀羅。唐言戒賢。今見在。初伏外道。得邑捨而造之。

其處竦一危峰如浮圖形置佛舍利。又西南五十許里度尼連禪河有伽耶城。少人物。婆羅門千餘家。住仙人之胤也。王所不臣。眾咸加敬。城北三十餘里。清泉俗傳聖水。飲濯之者罪消也。城西南六里許。伽耶山也。谿谷杳冥。世謂靈岳。自古君王登封告成也。頂有石塔高百餘尺。時放奇光。佛於此說寶雲等經。山東南尼連河減二里許。至鉢羅笈菩提山。言前正覺也。佛將證先登。因名也。佛自東北崗上頂欲入金剛定。震地搖山。神懼告佛。又至西南半崖中。面澗坐石。地山又震。淨居天告曰。此西南十五里。近苦行處。畢。

鉢羅樹下金剛座處是菩提座。三世諸佛咸此成覺。佛方就之。仍爲石室龍畱影也。今或有見者。及無憂興世於諸靈迹。皆表浮圖雨諸天華。每竟安居法俗。同往登山供菩提樹。其菩提樹周垣甃疊以崇固之。東西闊周可五百四十步。奇樹名華連陰列植。正門東開對尼連禪那河南門。接大華池。西阨險固。北門通大寺。其塲院內聖迹諸塔精舍。星張雲布。樹垣正中。金剛座者。賢劫初成。與大地俱。大千界中。下極金輪。上至地際。金剛所成。周百餘步。千佛同坐。入金剛定。故因號焉。卽證道之所也。又曰道場。大地震時。獨

無搖也。佛證覺後自入末法。沙土彌覆不見本質。傳佛說耳。遂以兩軀觀自在菩薩南北標界面南而坐。記云此像身沒佛法當滅。南隅像者今沒胸臆。佛在世時菩提樹高數百尺。枝黃葉青。冬夏不改。佛涅槃至葉凋。尋復後爲無憂王伐截於西數十步。聚而燒之。用以祠天。煙燄未止。忽生兩樹。猛火之中茂葉同榮。因謂灰菩提樹。王覩信生。以香乳灌餘根者。至巨樹生如本。王妃忿之。又夜重伐。王重新請以乳灌之。不日還生。壘石周垣。其高丈餘。近爲金耳國。月王又伐此樹。掘至泉水。不盡根。祇又縱火焚之。又以甘蔗

澆之令焦爛絕其本也。數月之後爲補刺拏伐摩王。此言滿胄卽無憂王之玄孫也。聞樹被誅舉身投地。請僧七日經行繞樹。大阬以數千牛乳灌之。經六日夜。樹生丈餘。恐後翦伐。周峙石垣高二丈四尺。樹今出於石壁上。二丈餘圍可三尺。樹東青甌精舍高百六十餘尺。基廣二十餘步。上有石鉤欄繞之。高一丈。層龕皆有金像。四壁鏤諸天仙。上頂金銅阿摩勒迦果。卽此所謂寶瓶及寶臺也。東南接爲重閣三層。檐宇特異。並金銀飾鏤。三重門外龕中。左觀自在。右慈氏像。並鑄銀成高一丈許。無憂王造也。精舍初小。後

因廣之內置成道像有婆羅門應募造之惟須香泥
及一燈內精舍中六月閉戶作之乃成尙餘四日僧
咸怪之因開觀覓見像儼然東面跏坐右足加上左
手斂右手垂不見作者座高四尺二寸廣一丈二尺
五寸像高一丈一尺五寸兩膝相去八尺八寸兩肩
六尺二寸相好具足惟右乳上圖飾未周更填眾寶
遙看其相終似不滿有僧夢匠者云我是慈氏恐工
拙思故自寫之言垂手者像佛語魔指地爲證近被
月王伐樹令臣毀像王自東返臣本信心乃於像前
橫施瓢障心愧闇故置燈於內外畫自在天像功成

報命。月王聞懼。舉身生胞。肌膚皆裂。尋卽喪歿。大臣
馳返。卽除壁障。往還多日。燈猶不滅。今在深室。晨持
鏡照。乃覩其相。見者悲戀。敬仰忘返。佛以唐國三月
八日成道。上座部云。當此三月十五日成道。時年三
十者。或云三十五者。斯之差互。彼自不同。由用麻前
後。故有此異。猶神州麻元。各各不同。三代定正。延縮
不等。何足怪也。且據一相取悟。便止。佛成覺已七日
寂定。至於樹北七日。經行南北。往來十餘步。許異華
隨跡。有十八文。後人甄壘爲基。高三尺餘。俗云聖跡
基也。表人命之脩短者。先發誠願。以繩度之。隨壽短

長增減有驗。此北道左磐石上大精舍作佛上望仰
觀樹相爲報恩像。當時七日目不暫捨。樹西大精舍
鑿石像東面立。飾奇珍。前有青石奇文異采。初成道
日。梵王起七寶堂。帝釋起七寶座。佛據上。七日思惟
放光照樹。今寶爲石。樹南浮圖高百餘尺。初佛於河
沐已。將坐念草。帝釋化人以姑尸草。言吉祥也以奉佛處。
育王造塔表之。次東北塔是證果時。青雀來繞羣鹿。
呈祥處。樹東大路左右各一塔。是魔王嬈佛衰退處。
樹西北精舍中。迦葉波佛時放光明。俗云至誠七繞
生得宿命智。又垣西北塔。鬱金香泥高四丈餘。樹垣

東南隅尼拘盧樹側有塔。精舍中有座佛。初證果時。大梵王請轉法輪處。垣內四隅皆有塔。初佛受草趣樹。先至西南地動。又向西北。又東北。又東南。並地爲震。卽西北至樹下。東面坐金剛座上。地方安靜。故立塔。記垣外西南二牧女宅處。其側煑糜處。又側佛受糜處。皆立表塔。樹南門外大池。周七百餘步。清澄魚龍所宅。次南池者。帝釋所造。爲佛濯衣。池西大石。天帝雪山將來。爲佛曬衣。側塔是佛納故衣處。次南林中一塔。佛受貧母施故衣處。化池東林龍池。青黑味甘。岸西小精舍中。像佛初成道。此坐七日入定。龍

王繞佛七帀化多頭蓋佛處。龍池東林精舍作佛羸瘦像。側有經行跡七十餘步。南北各有卑鉢羅樹。往來攀而後起。卽苦行六年日食一麻麥。處今有疾者香油塗像多愈。又有五人住處塔。又東南塔佛入尼連河浴處。次近河佛食乳糜處。於道樹下受解脫也。其側二塔。長者獻蜜。麩處。樹東南塔。是四天王四方來各持金鉢。及諸寶鉢。佛皆不受。乃各持石鉢。紺青映徹。方總受之。按爲一鉢。外現四際。其側有塔。成道後爲母說法處。現神變處。度優婁迦葉千人處。又西北伏火龍處。五百獨覺入滅處。目真龍池南迦葉謂

佛溺水處。魔怖佛處。皆立表塔記之。樹垣北門外。卽摩訶菩提寺。庭宇六院。觀閣三重。周垣高五丈許。佛像鑄金銀。莊嚴工巧。極世華美。塔又高廣。有佛舍利。大如指節。光潤鮮白。通徹內外。內舍利者。大如青珠形。帶紅色。每年至佛大神變月。出以示人。卽印度十日於唐正月十五日也。於此時也。放光雨華。大起深信。其寺常僧減一千人。習大乘上座部法儀。清肅。是南海僧伽羅國王請中印度大吉祥王立之。經今四百年矣。故寺多師子國人。又菩提樹面十餘里。聖迹相鄰。差難備舉。每年比丘解安居。訖四方諸俗。百千萬眾。七日

七夜香華伎樂徧林供養禮拜奉慶。印度諸僧以唐之月十六日入夏。安居以唐八月十五日解夏。斯亦隨終一變不可約之。如雪山北有國坐春坐秋者。意以一年之內多溼熱處。制三月住就中前後一月。延促不定。若據修道何時不安。故三時遊行通制。有罪必有緣務。亦開兼濟。不執也。菩提樹院東渡尼連河大林中塔北池者。佛昔爲香象子侍盲象母處。前建石柱。昔迦葉波佛於此宴坐。側有四佛行坐跡。林中小石柱是鬱頭藍發惡願處。又東度莫訶東大林野行百餘里至屈屈吒播陀山。言雞足也亦謂窳盧播陀。

山言尊足也直上三峰狀如雞足。階絕孤起。迥然空表。半

下茂林。半上蔓草。尊者大迦葉波於中寂定。故因名焉。初佛以姨母織成金縷袈裟。傳付慈氏佛。令度遺法。四部弟子迦葉承旨。佛涅槃後。第二十年。捧衣入山。以待慈氏。上有一塔。靜夜望之。明炬自照。雞足山東北百餘里。至佛陀伐那山。北崖大石室。佛止數年。旁有磐石。帝釋摩檀塗佛。今猶芬烈。從空谷東出三十餘里。申瑟知林言杖林也。竹滿山谷。昔有人以丈六竹杖量佛。而恆出杖表。因投杖而去。遂生根而被山焉。中有一塔。佛曾七日說法處。林中有勝軍居士。以香

末爲泥作五六寸塔。上書經文名法舍利也。三十年
閒晝夜無息。凡作七億。每一億小塔。作一大塔。盛之。
請僧法會。稱慶其事。皆放光明。杖林西南十餘里。大
山陽。二溫泉甚熱。佛化浴焉。遠近沐者。沈痾皆愈。側
有佛經行像塔。林東南七里許。大山嶺上石塔。佛於
此兩三月爲天人說法。頻毗婆羅王壘石爲道。廣二
十餘步。長四里許。大山東北四里許。至孤山。仙人室
也。又東北五里。小孤山。壁石室。可坐千人。佛於此三
月說法。室上磐石。梵釋於此。摩檀塗佛。今猶郁烈。室
西南隅巖岫。卽阿素洛宮石室。側頻毗王往佛所。棧

道斷石通路長五里許作階也。又東行六十餘里至

矩奢揭羅補羅城。

此云茅城

上茅宮城卽摩竭陀之正中

也。多出香茅。國中最勝。古來諸王都其山。城門闕在

焉。因香爲名。崇山四周以爲外郭。西通狹徑。北關山

門。東西長。周迴一百五十里。樹華含茂。皆作金色。內

城周三十餘里。城內荒涼。都絕人物。北門外塔佛舒

手。現五師子。伏提婆醉象處。又東北塔是舍利子聞

馬勝比丘說法證道處。塔北大深院。旁塔是室利毘

多。

言勝蜜也

設火阬以害佛處。院東北山城之曲有塔。是

縛迦醫王宅爲佛。建說法堂。周垣華果。檠株尙在。佛

多止中。宮城東北十五里許。至姑栗陀羅矩吒山。

言鷲

峯亦鷲臺古者闕岫也。

接北山陽孤起頂上。東西長。臨崖西陲。

甄室廣高奇製。其戶東開。佛住世五十年。多居斯室。說法。今作等佛身像。昔影堅王爲聽法。故自山至峯。跨谷陵巖。編石爲道階。凡六里。廣十餘步。從杖林石室至此。三階跡猶存焉。階側二小塔。一令王下一簡凡人。其上精舍。東長石。佛曾經行履之。旁有大石高丈四五。廣三十餘步。是提婆所擲佛者處。其南崖下塔。佛此說法。華經處。精舍南山崖大石室。佛於此入定。阿難別室。魔怖之佛。以手通石摩頂。見有通穴。精

舍東北大石澗大磬石佛曬衣處。又今明徹旁有佛跡輪文入石。北山頂塔佛望摩揭城。七日說法處。山城北門西有毗布羅山。西南崖陰昔有五百溫泉。今猶數十尙兼冷煖。源發雪山無熱惱池。潛流出此。猶清且美味。同本池並彫石爲師子之首。石以同流。下乃編石爲池。浴者病差。諸有僧寺多取飲之。以水沐髮終身常淨。使人王玄策曾以沐首。經今五載髮常潤淨。不可思議。泉左右塔及精舍。故基羅列。並四佛行坐跡。此中山林相兼。隱者見處。泉西卑鉢羅石室。佛昔恆居。後壁洞穴。是阿素洛宮。此毗布羅山上塔。

是佛說法處。今露形外道居之。山城北門左南崖陰東行三里許大石室。調達入定處。室東有班血磐石。上古有比丘修定不證。自刺頸。便證羅漢。升空化火。自焚處。崖上石塔。習定者投崖證果處。北門外一里餘。至迦蘭竹園精舍。石基甃室。東開佛多止中室。尙存矣。今有等佛身像。竹園東大塔。是阿闍多設咄路。云未生怨卽闍王也。得舍利分所建。後無憂王開之。別建諸塔。餘在者。時放光焉。側有佛經行處。東有阿難半身塔。竹園西南六里許。南山陰大竹林中。大石室。是大迦葉波與千羅漢於此集三藏處。僧中上座卽號

上座部焉。室西北塔是阿難受責證果處。名證果塔也。西行二十餘里塔者。是諸學無學大眾法集五藏處。因謂大眾部焉。竹園北二百餘步迦蘭池。佛多說法。今枯涸也。池西北三里許塔。育王立高六十尺。石柱五十餘尺。上刻立塔事。柱東北不遠至曷羅闍婁利呬城。卽新王舍城。本寒林地。闍王移都所築。當茅城東北四里。外郭已壞。內城周二十餘里。面有一門。無憂王更都香華城。將此施婆羅門。今住者減千家。宮城西南二小寺。佛昔說法處。諸國客僧多來投止。次西北塔。殊底迦長者故里。卽樹提伽也。此言星麻。王城南門外道左塔者。佛說法度羅怛

羅處又北三十餘里至那爛陀寺。

言施無厭

本南庵沒羅

園也。昔有五百商人買以施佛。於中三月說法。前後五王之所合造。一鑠迦羅阿迭多王。此言帝日創造此寺。二佛陀毘多王。此云覺護。次南造寺。三但陀揭多王。此言如來。次東造寺。四婆羅阿迭多王。此言幻日。次東造寺。五伐闍羅王。此言金剛。次北造寺。周垣峻峙高五丈許。總有七院。院別三層。同爲一門。歷代興建窮壯極麗。寺立嚴制。立寺已來。女人不至。知事十人。每夕巡檢。未具受者。齒序爲次。僧徒數千。遊學名僧。通數將萬。多是俊才。通學聲馳異域者。其人數

百故印度諸僧皆仰則焉。其有不談藏旨者，形骸自愧。故殊方來詣守門者，詰問多屈而返。或客遊後進，詳論藝能，其退飛者固十有七八矣。所以高才博達，強識多能，明德引人，聯暉接物，至如護法護月，擢績芳塵，德慧德堅，流譽物表，光支清論，勝友高談，智月風鑒，戒賢志業，皆純粹於當時，並昭彰於遂古。旣學冠舊儀，述作論釋，各數十部，盛世流布，故寺聖迹，略而可敘。寺西精舍，佛曾三月說法。次南百步小塔，遠方僧見佛處。又南有觀自在菩薩立像，或見執香爐繞精舍右旋者。次南一塔，佛曾三月住剃剪處，疾繞

多愈。西垣外池側塔是外道執雀問佛處。東南垣內五十餘步有奇樹高八九尺其幹兩披佛昔嚼棄生而如此。次東大精舍高二十餘丈佛曾四月說法處。次北百餘步精舍觀自在像見感不同。或立門側或出檐前。故國法俗咸別供養。次北大精舍高三十餘丈。戒日王造莊嚴度量及中佛像同菩提樹下精舍也。次東北塔佛曾七日說法處。西北卽四佛坐處。次南鑿石精舍高八十尺。戒日王造今猶未了。又東二百餘步垣外有銅立像高八十餘尺。六層閣盛滿曹王所造。此北三里甄精舍中多羅菩薩像量高靈異。

歲之元日盛興供養諸國王臣寶樂俱奏七日乃止。寺垣門內大井佛爲商侶熱渴指地曰此可得水。因以車軸築之泉涌飲之悟聖也。寺西南九里許沒特伽羅故里育王造塔記目連也。又東四里許是頻毗王。此云影堅迎佛處。又東南二十餘里舍利子故里育王建塔。旁有尊者遺身塔及井在矣。又東南五里塔迦葉波佛時有三億大羅漢同此入滅處。又東三十餘里帝釋窟也。巖谷危險華林竦茂兩峰特起。西巖南面石室佛曾止住。釋以四十二疑畫石請問其跡。向存。今像擬昔入禮肅然。嶺上四佛行坐跡。東峯有寺。

僧夜西望見石室前有燈炬然帝釋峯寺前有鴈塔其緣如經。帝山東北百六十里許至迦布德寺。云鴈也。

僧有二百人。寺東有塔佛爲大眾一宿說法。往昔佛作鵠投火與羅耆食處。東有育王塔。塔南三里孤山甚高峻多塔廟。上觀自在像。軀小威大。手執蓮華頂戴佛像。斷食七日。乃至一月。便見眞儀。從像中出。卽僧伽羅王所造精舍也。又東南行四十里。寺僧五十人。小乘學。大塔多靈佛。爲梵王等七日說法處。側有四佛行坐跡。寺東北七十餘里。苑河南天祠。東大塔。佛曾一宿說法處。又東入山林百餘里。大寺育王塔。

佛曾三月說法處。北三里大池。周三十餘里。四色蓮華。四時閒發。又東入山林二百里。至伊爛拏鉢伐多

國

中印度

周三千餘里。都城北臨菟河。周二十里。寺十

所僧四千餘人。多小乘。正量部。天祠二十餘。異道雜住。城中二寺。各減千僧。並小乘學。城北河側伊爛拏山。古來五通仙常居。今有天祠佛於此。三月說法。城南塔佛曾三月說法。旁有三佛行坐跡。國西界菟河南岸。孤山長一里餘。佛曾三月安居。降薄句羅鬼藥。又處山東南崖下。大石上佛坐跡。入石寸餘。長五尺二寸。廣二尺一寸。上有塔蓋。次南石上佛拈稚迦卽澡

也 磧底深寸餘八出華又坐跡東南藥叉跡長尺六寸

廣八寸深二寸山頂有藥叉故室北有立佛跡長尺

八闊六寸餘深半寸上塔覆西有溫泉六七極熱國

南大林多野象極大從此順苑河南岸東行三百里

至瞻波國中印周四千餘里都城北臨苑河周四十

餘里寺數十僧二百餘人小乘學也天祠二十餘所

異道雜居城以甃壘高數丈卻敵崇峻劫初人物伊

始野居穴處後有天女降人中遊苑河濯流自媚感

靈有娠生四子分瞻部州分疆建邑此則一子之都

城卽瞻部之始主也地溫熱宜象耳城東百五十里

苑河南水環孤州中山崖上天祠多靈其國界野象羣遊又東四百餘里至羯朱噉祇羅國

中印度

周二千

餘里寺七所僧三百餘人天祠十所異學雜居地多

泉溼城北苑河岸有大高臺以甄爲之四面鏤佛天

等像南境多野象耳戒日王遊巡東天於此築行宮

又東度苑伽河六百餘里至奔那伐彈那國

中印度

周

四千餘里都城周四十餘里人盛滿寺二十餘僧三

千餘人大小兼學天祠百所異道雜居露形偏多城

西二十餘大寺僧七百餘人並大乘學東印度境名

僧出此有育王塔佛曾三月於此說法齋日放光側

有四佛行坐跡。次精舍中作觀自在像。神降非一人。

多絕粒祈者必感。土地卑溼。出般耶婆果。既多且貴。

大如鶴卵。或在樹枝及根中。如茯苓也。又東九百餘

里。渡大河。至迦摩縷波國。

東印度也

周萬餘里。都城周三

十餘里。至今未有佛法。自事天神。天祠數百。異道數

萬人。有摩羅王。

言童子也

據之。相承千餘世矣。土泉溫郁。

人物昌盛。其國東境接唐西南。有諸蠻獠。於彼朝貢。

云。可兩月行。便入蜀之西界。其國東南。又饒野象。其

王聞沙門玄奘名。略遠來中。天迎請。東達。既見。傾仰。

奄若舊交。生信。釋門光開。佛教。奘又論議。伏諸外道。

授以歸戒。更廣揚化。是則東天佛教。由奘弘之。聲唱遐塞。戒日王知。又延西返。重加禮敬。事在別傳。從此南行。千三百里。至三摩呬吒國。東印周三千餘里。近海卑溼。都城周二十餘里。寺三十餘僧。二千餘人。上座部也。天祠百餘。異道露形甚盛。城側育王塔。佛曾七日說法。處旁有四佛行坐跡。側寺中青玉像高八尺。相具威嚴。自此東。北大海濱山谷中有室利差呬羅國。次東南海隅有迦摩浪迦國。次東有墮羅鉢底國。次東有賞那補羅國。次東有摩訶瞻波國。卽林邑也。次西南有閻摩那州國。凡此六國道阻不行。又從

三摩呬吒國西行九百里至耽摩栗底國。東印度周千

五百里。都城周十餘里。濱海。卑淨寺十所。僧千餘人。

天祠五十。異道雜居。育王立塔四。佛行坐跡。又西北

行七百餘里。至羯羅拏蘇伐刺那國。東印度金耳國也。周四

千五百里。都城周二十餘里。人物殷盛。邪正兼半。寺

十餘。僧二千餘人。小乘正量部。天祠五十餘。異道甚

多。別有三寺。不食乳酪。調達部也。城外寺塔。育王所

造。佛嘗七日於此說法。側有精舍四。佛行坐跡。又西

南七百餘里。至烏荼國。東印度也。周七千餘里。都城周二

十餘里。信佛法寺百餘。僧萬餘人。並大乘學。天祠五

十異道雜居。塔有十餘。並佛曾說法處。西南境大山。中大寺石塔多。瑞齋日放光。承露盤下覆鉢。勢上以華蓋。笥置之便住。如磁石吸鍼也。自此西北山寺塔異者同前。二塔爲神鬼所造。東境臨大海。折利咀囉

城

言發行者

周二十餘里。入海商人止路次也。城外五寺。

臺閣崇高。尊儀巧異。南去海中僧伽羅國二萬餘里。

靜夜望彼佛牙精舍。數百尺表上鉢曇摩羅伽寶。大寶

如升卽琥珀也

珠光挺照。懸燭此城。又西南大林千二百餘

里。至恭御陀國。東印度周千餘里。城都周二十餘里。濱

海。土熱溼。多有奇寶。螺貝眞珠。大青象等。其俗信外

道天祠百所異道萬餘人境內小城數十據山海住

又西南大荒林行千五百里許至羯餒伽國南印周

五千餘里都城周二十餘里少信佛法寺十餘僧徒

五百餘人大乘上座部天祠百餘異道甚多城南育

王塔高百餘尺四佛坐處境北垂大山嶺上塔高百

餘尺劫初人壽無量時獨覺入滅處國中深林數百

里出香象鄰國所重昔五通仙巖栖人觸通退便以

惡呪殺此國人今猶少也又此西北山林中行一千

八百餘里至憍薩羅國中印周六千餘里山嶺周境

林藪連接城周四十餘里邑里相望大信佛法寺百

餘僧減萬數並學大乘天祠七十異道雜居城南故
寺塔佛曾現通伏外道處後龍猛菩薩止此寺中又
西南三百餘里有跋邏末羅耆釐山云黑峰也岌然特上
峯峭斗絕既無崖谷宛如金石其國昔有引正王爲
菩薩鑿山造寺去山數十里鑿開孔道當山下仰穿
疏石長廊步檐崇臺重閣閣有五層層有四院並有
精舍妙窮工巧從山頂上飛泉流注重疊交通疏寮
引明其內通朗人力既竭府藏又盡其功未半王甚
憂之龍猛密以神藥滴諸大石並變爲金王見喜勇
遂營得就於五層中各鑄四大金像量等佛身餘尚

積庫。因僧有誨工人用費並散傾久。今惟淨人守護其數極多。彌密其穴不可輒見。又結法藏後。一切諸經並此山中不許持出。近有引醫方者入中療病。後蒙面而出。故罕有達者。從南林行九百餘里至案達羅國。南印度周三千餘里。都城二十餘里。寺二十僧三千餘人。天祠三千餘。外道極多。城側大寺重閣奇巧。佛像亦異。前有石塔高數百尺。並阿折羅。言所行也阿羅漢所造。近寺西南二十餘里孤山嶺上石塔。卽陳那菩薩造。因明論處。又西南一塔。佛曾於此說法。從此林野南行千餘里。至馱那羯磔迦國。南印度周六千餘

里都城周四十餘里寺多毀壞存者二十餘僧千餘
人大眾部也天祠百餘異道甚多城東西據山閒各
有大寺昔王爲佛造奠山疏石製極華博賢聖遊息
佛滅未久有千凡僧安居罷日皆證無學陵虛飛去
今寂無人。有婆毗吠伽論師此云明辯卽波若燈論主也
於觀自在前絕粒而飲水三年待見慈氏觀自在乃
爲現色身令在此城南大山巖執金剛神所誦金剛
呪三年神授方云此巖石內有阿素洛宮如法行請
石壁當開可卽入中待慈氏出我當相報又經三年
然呪芥子擊於石壁豁卽洞開時百千眾觀靚驚歎

論師跨門再三顧命惟有六人從入餘者謂毒蛇窟

也當卽石門還合如壁自此西南千餘里至珠利耶

國南印周二千五百里都城周十餘里人物少僧寺

麤有天祠數十多露形外道城東育王塔佛於此度

人伏外道處城西故寺提婆菩薩詰問溫胆羅羅漢

此云上也七轉已羅漢杜口不答私運通力往慈氏所告

曰提婆者賢劫之佛非爾能酬如彈指頃還復談對

菩薩知之謂曰此慈氏大聖之所釋也南林野行千

六百里至達羅毗荼國南印周六千餘里都城周三

十餘里寺百餘僧萬餘人皆上座部天祠八十餘多

露形外道。有育王塔。佛數遊此說法度人。城南大寺塔高百餘尺。佛曾說法伏外道處。又有四佛行坐跡。自此南行三千餘里。至秣羅矩吒國。南印周五千餘里。都城周四十里許。僧少。天祠數百。外道甚多。露形者。其土溽鹵不滋茂也。城東有育王弟寺。又育王立塔。佛曾說法祈願皆遂。國南近海有秣刺耶山。有白檀香樹。又羯布羅香樹。松身異葉。香如冰雪。卽龍腦香也。山東有布咀落伽山。頂有池。流下出大河。繞山三十市。而入南海。側池天宮。卽觀自在遊舍處也。祈者見爲自在天像。山東北海畔。城古僧伽羅國。今入

海三千餘里至僧伽羅國。

非印度攝卽
執師子也

周七千餘里。

都城周四十餘里。人戶大盛。寺有數百。僧二萬餘人。上座部也。宮側有佛牙精舍。高廣如前宮。中日建萬八千僧食。十數年來。國亂方廢。佛牙側小精舍中。金銅坐像。肉髻上安奇寶。昔人因禮見寶起貪。夜盜不及像首。乃曰佛昔輕命爲生。今何惜寶。乃爾像乃俯首與之。後王知而不罪。王贖其寶。還安像頂。至今低首。國東南隅數千里。那羅稽羅州人長三尺。鳥喙。惟食椰子。國州東南隅有駿迦山。鬼神所遊。佛於此說經。州西浮海數千里。孤島東崖石佛高百餘尺。東面

坐以月愛珠爲肉髻。月將迴照水卽懸注人食之矣。州西浮海又數千里有大寶州。無人居止。往無達者。

又於達羅毗國北林行二千餘里至恭達那補羅國。

南印度周五千餘里。都城周三十餘里。寺百餘。僧萬餘。

人兼學大小天祠。數百異道。雜居宮城側。大寺精舍。

高十餘丈。僧三百餘人。中有一切義成太子寶冠。減。

二尺許。齋日放光卽菩薩時也。大城側大寺中精舍。

高五丈餘。二百億羅漢。是人名造檀慈氏像。高一丈餘。

齋日放光。城北近多羅林。周三十餘里。葉廣長。色光。

潤諸國同采以供書也。林中塔四。佛行坐迹。二百億。

舍利塔亦此林中。城東塔高三丈有舍利齋日放光
佛曾遊此說法。又西北林中猛獸所居。二千五百里
許至摩訶刺侘國。南印度周六千餘里。都城臨大河。周
三十餘里。其俗有恩必報。有怨必復。強梁跋扈不賓。
戒日王也。寺有百餘僧徒。五千餘人。大小兼學。天祠
百數。異道眾矣。大城內外五塔。四佛行坐迹。育王表
之城南。故寺有觀自在石像。願求多果。東境大山寺
羅漢造也。大精舍高百餘尺。石像高七十餘尺。上有
石蓋七重。虛懸空中。相去各三尺。傳云羅漢願力所
持。或威神力。或藥術力。諸說不一。精舍四面彫作佛

因地及證果入寂相具矣。寺門外南北各一石像。傳云象吼地則震矣。自此西行千餘里。度耐末陀河。至

跋祿羯帖婆國。

南印度

周二千五百里。都城周二十餘

里。邪正兼信。寺十餘。僧三百餘人。習大乘法。上座部。天

祠十所。異道雜居。土地鹵惡。草木希薄。從此西北二

千餘里。至摩臘婆國。

南印度

周六千餘里。都城周三十

餘里。據莫訶河。東南卽五印度之重學土也。人性善

順。諸國所無。同摩揭陀南州。敬教其二國而已。邪正

兩信。寺數百。僧二萬餘。小乘正量部。天祠數百。異道

塗灰其侶眾矣。城西北二十里。有大婆羅門邑。側大

陷阮水流無滿昔大慢婆羅門謗大乘生陷入地獄

處自此西南入海道矣又西北行二千五百餘里至

阿吒釐國南印周六千餘里都城周二十餘里人盛

滿家事天神祠十餘所異道雜居土地沙鹵出胡椒

樹如蜀椒樹又出熏陸香樹葉如棠也又從摩臘國

西北三日行彼百里為一日行至契吒國南印周三千餘里

都城周二十餘里人滿住寺十餘僧千餘人大小通

學天祠數十外道特多又北千餘里至伐臘毗國南印

度即北羅羅之別也周六千餘里都城周三十餘里人住盛多

財百億者有數百家寺百餘僧六千餘人多小乘正

量部天祠數百外道亦多佛數遊此國育王多樹塔有三佛行坐迹又於西北行七百餘里至阿難陀補

羅國西印周二千餘里都城周二十餘里人戶滿寺

十餘僧減千小乘正量部天祠數十外道雜居從伐

臘西五百餘里至蘇刺吒國西印周四千餘里都城

周三十餘里西據莫醯河人住滿屬伐臘兼信邪正

寺五十餘僧三千餘人上座部也天祠百餘外道雜

住地鹵斥華果少國當西海路口不遠城西山頂有

寺大宏敞華美仙賢遊止又伐臘北千八百餘里至

瞿折羅國西印周五千餘里都城周三十餘里人咸

少信佛寺一所僧百人小乘學天祠數十異道多矣

又東南二千八百餘里至鄔闍衍那國南印周六千

餘里都城周三十餘里人盛滿寺在者五所僧三百

人大小兼學天祠數十異道雜居地鹹果少城側塔

者無憂造生地獄處又東千餘里至擲枳陀國南印

周四千餘里都城十五里許寺數十僧少耳天祠十

所外道千餘人又北九百餘里至摩醯溼伐羅補羅

國中印周三千里都城周二十餘里不信佛法天祠

數十塗灰外道也從瞿折羅北野磧行二千里許渡

信度河至信度國西印周七千餘里都城三十餘里

土出金銀鋤石。一峰駝駝極卑小。出赤白黑鹽。信佛法寺數百僧萬餘人。並小乘正量部而多怠行。天祠三十異道雜居。佛屢遊此。育王建塔數十焉。有烏河側千餘里。陂澤閒數百千戶。牧牛爲業。惟殺是務。無貴賤男女道俗之別。而剃頭髮服袈裟形同比丘樂行鄙俗。又懷小見。排斥大乘。昔有羅漢乘空往化。授三歸已。剃染行法。後還服本風俗。故爾。自東九百餘里。越信度東岸。至茂羅三部。盧國_{西印}。周四千里。都城周三十餘里。人咸屬磔迦國。寺十餘。僧極少。特信天神。其祠八所。外道甚多。城側有日天祠。莊嚴甚麗。

鑄金爲天形飾以奇珍。女樂迭奏。四周華池。林木茂

美。五竺諸王於此立福舍。捨物給貧病者。又東北七

百餘里至鉢伐多國。北印度屬磔迦也。周五千餘里。都

城周二十餘里。人咸雜信。寺十餘。僧千餘人。小大兼

學。有育王塔。天祠二十。城側大寺。僧百餘人。並大乘

學。近天火燒之。土多旱稻。從信度西南千六百里至

阿點婆翅羅國。西印度周五千里。都城周三十餘里。僻

在西境地。卑下臨信度河濱。大海重佛法。寺八十餘

僧五千餘人。多小乘。正量部。天祠十所。塗灰。外道也。

佛曾遊此。育王立六塔。又城西減二千里。至狼揭羅

國西印廣從各數千里都城周三十餘里人盛滿近

西海入西女國路口屬波斯寺有百餘僧六千餘人

大小兼學天祠數百塗灰道盛土潤洽滋茂百卉自

此西北即至波刺斯國非印周數萬里都城周四十

餘里人物甚盛寺有三所僧數百人天祠甚多土出

金銀鍮石頗胝水精死多棄尸佛鉢在王宮中東境

有鶴秣城郭周六十餘里人眾盛西北接拂懽國非印

度出伯狗子本赤頭鴨生於穴中案梁貢職圖云去

波斯北一萬里西南海島有西女國非印拂懽年別

送男夫配焉彼圖又云波羅斯西一萬里極婆羅門

國南一萬里又是婆羅門以今往度疑太遠從阿

點北七百餘里至臂多勢羅國西印周三千餘里都

城周二十餘里人盛屬信度國寺五十餘僧三千餘

人小乘正量部天祠二十餘塗灰外道也城北十六

里大林四佛行坐處育王建塔高數百尺中有舍利

放光佛曾作忍仙被此王害處東有故寺又東北三

百餘里至鞏茶國西印周二千五百里都城周二十

餘里國無君長屬信度寺二十所僧二千餘人小乘

正量部天祠五所塗灰外道也地多華果城東大竹

林古寺是佛開諸比丘著互縛屣此言處也旁塔高

百餘尺。側有精舍。青石立佛。齋日放光。此南八百步。林中浮圖。育王所立。佛止於此。以寒故。三衣重覆。又開複納衣。林中有佛經行處。又四佛坐處。別塔表之。又髮爪塔。齋日放光。又東北九百餘里。至伐刺拏國。西印周四千餘里。都城周二十餘里。人住滿屬迦畢試。寺數十。僧三百人。大小兼學。天祠五所。塗灰外道也。地多山林。城南故寺。佛曾遊此。側塔是四佛行坐迹。俗云此國西接疊那國。居大山中。復此西北。又踰大山二千餘里。出西印度境。人胡俗。境漕矩吒國。又東北千六百里。入迦畢試界。方合北道及中道也。略

舉突厥已南三海所內合一百五十國。非印度所攝。

者七十一國。突厥以北至于北海而遊履無聞。故無可紀也。

釋迦方志卷第三

釋迦方志卷第四

唐終南太一山釋道宣撰

遊履篇第五

自文字之興庖犧爲始暨至唐運曆代可紀而聞矣。秦周已前人尙純素情不逮遠故使通聘止約神州。漢魏以後文字廣行能事鬱興博見彌遠故象胥載庇藁街斯立踰空桑而歷昆丘度雞田而跨鳥穴龍文汗血之驥雖絕域而可追明珠翠羽之珍乃天涯而必舉窮兵黷武誠大宛之勞師擁節泥海信王命之遐弊及顯宗之感瑞也。創開仁化之源奉信懷道

自斯漸盛。或慨生邊壤。投命西天。或通法揚化。振策東宇。或躬開教迹。不遠尋經。或靈相舊規。親往詳閱。斯之多舉。竝歸釋宗。故總別之用。開神略。始於前漢。至我大唐。前後通數。使之往返。將二十許。且張騫尋河本。惟凡俗。然創聞佛名。則釋化之漸也。故亦通敍求法之例。今搜括傳記條序。使塗列其前後。顯然有據。

一謂前漢武帝遣博望侯張騫尋黃河之源。從北道入大宛。至大夏。見筇竹杖。蜀布。國人云。出身毒身毒。卽天竺之訛語也。後漢書云。其國殷平。和氣靈智。所

降賢懿挺生神迹詭怪理絕人區感驗明顯事出天外而騫超無聞者豈其道閉往運數開叔葉乎。

二謂後漢顯宗孝明皇帝永平三年夜夢金人身長丈餘項佩日月光飛行殿前帝問羣臣通人傅毅曰臣聞西域有神其名曰佛陛下所夢將必是乎帝乃遣郎中蔡愔博士秦景等從雪山南頭懸度道入到天竺圖其形像尋訪佛法將沙門迦葉摩騰竺法蘭等還尋舊路而屆雒陽。

三謂後漢獻帝建元十年秦州刺史遣成光子從鳥鼠山度鐵橋而入窮於達觀旋歸之日還踐前途自

出別傳。

四謂晉武世燉煌沙門竺法護西遊三十六國大齋胡經沿路譯出。至長安青門外立寺結眾千餘。教相廣流。東夏者法護深有殊功。故釋道安云。若親得此公筆。自綱領必正。斯至言也。

五謂東晉隆安初涼州沙門釋寶雲與釋法顯釋智嚴等前後相從俱入天竺。而雲通歷大夏諸國。解諸音義。後還長安。及以江表詳譯諸經。卽當今盛行。莫非雲出而樂栖幽靜。終於六合山遊。西有傳。

六謂東晉後秦姚興弘始年京兆沙門釋智猛與同

志十五人。西自涼州鄯善諸國至罽賓。見五百羅漢。問顯方俗。經二十年至甲子歲。與伴一人還東。達涼入蜀。宋元嘉末卒。成都遊西有傳。大有明據。題云沙門智猛。遊行外國。傳曾於蜀部見之。

七謂後燕建興末。沙門曇猛者。從大秦路入達王舍城。及返之日。從陀歷道而還東夏。

八謂後秦弘始二年。沙門法顯與同學慧景等。發自長安。歷于填道。凡經三十餘國。獨身達南海師子國。乃汎海將經像。還至青州牢山。登晉地。往楊荊等州。出經所行出傳。

九謂宋初涼州沙門智嚴遊西域至罽賓受禪法還長安南至揚州宋都廣譯諸經。然以受戒有疑重往天竺。羅漢不決。爲上天詔彌勒告之得戒。於是返至罽賓而卒。遣弟子智羽等報徵西返。

十謂宋永初六年黃龍沙彌釋法勇操志雄遠思慕聖迹招集同志沙門僧猛曇朗等二十五人發迹雍部西入雪山乘索橋并傳杙度石壁及至平地已喪十二人。餘伴相携進達罽賓南。歷天竺後汎海東還廣州所行有傳。

十一謂宋元嘉中涼州沙門道泰西遊諸國獲大毗

婆沙還於涼都沮渠氏集眾譯出。

十二謂宋元嘉中冀州沙門慧叡遊蜀之西界至南天竺。曉方俗音義還廬山。又入關。又返江南。

十三謂後魏太武末年沙門道藥從疏勒道入經懸度到僧伽施國。及返還尋故道著傳一卷。

十四謂宋世高昌沙門道普經遊大夏四塔道樹靈迹通謁別有大傳。又高昌法盛者亦經往佛國著傳四卷。

十五謂後魏神龜元年燉煌人宋雲及沙門道生等從赤嶺山傍鐵橋至乾陀衛國雀離浮圖所及返尋

於本路

十六謂大唐京師大莊嚴寺沙門玄奘以貞觀三年自弔形影西尋教迹從初京邑西達沙州獨陟險塞伊吾高昌備經危險時高昌王麴氏爲給貨賂傳送突厥葉護牙所又被將送雪山以北諸蕃胡國具觀佛化又東南出大雪山達諸印度經由十年後返從蔥嶺南雪山北歷諸山國東歸經于闐婁蘭等凡一百五十國貞觀十九年安達京師奉詔譯經乃著西域傳一十二卷。余歷尋僧傳并博聽聞所遊佛國備之前矣。然記傳所見時互出沒取其光顯者方爲敘

之。至如法維法表之徒標名無記者其計難緝。又隋代往還唐運來往咸纘履歷具程油素諸如此例何可具焉。

通局篇第六

法王利見未隔中邊適化無方豈專形教致使聞同解異說一悟殊登位地而上征結封迷而下降全身碎身之相聚塔散塔之儀神光燭而邪計摧靈迹挺而深信結斯徒眾矣具列前篇自法水東流道光西照聲榮之盛騰實東川育王表塔創啟隆周釋父影形鬱興炎漢自斯歷代世積彌繁景匪西天獨揚神

化。故經云正法後被先於北方次及東南至中方滅。此之震旦南望華胥滅度之儀迴身北首卽其事矣。所以依錄編次以爲通局篇云。

案周書異記周昭王卽位二十四年甲寅歲四月八日。江河泉池忽然泛漲井水溢出山川震動有五色光入貫太微徧於西方盡作青虹色太史蘇由曰有大聖人生於西方。一千年外聲教及此昭王卽敕鐫石記之埋於南郊天祠前此卽佛生之時也。周穆王卽位三十二年數見西方光氣蘇由先說聖人處世卽與相國呂侯乘驂騶八駿西行求佛因以讓之。周

穆王五十三年壬申歲二月十五日平旦暴風忽起
損舍折木地動天陰西方白虹十二道太史扈多曰
西方聖人滅矣此卽涅槃之相也有說云佛生周莊
魯莊之世者今取多文爲錄史錄曰商太宰誥問孔
子曰孰爲聖人孔子曰西方之人有聖者焉不治而
不亂不言而自信不化而自行蕩蕩乎民無能名焉
老子西昇經云吾師化遊天竺善入泥洹前漢孝武
帝元狩中霍去病討匈奴至罽蘭過居延山獲昆耶
休屠王等又獲金人率長丈餘列之於甘泉宮帝以
爲大神燒香禮拜及開西域遣張騫使大夏還云有

身毒國身毒國一名天竺始聞浮圖之教此卽佛之形教相顯之漸也哀帝元壽年使景憲往大月氏國因誦浮圖經還漢當時稍行浮圖齋戒成帝時都水使者光祿大夫劉向傳云向博觀史籍往往見有佛經及著列仙傳云吾搜檢藏書太史創撰列仙圖黃帝以下迄至於今定檢實錄一百四十六人其七十四人已見佛經矣據此而明秦周已前早有佛法流行震旦何以取知今案所列故佛傳云佛滅度後一百一十六年東天竺國有鐵輪王統閻浮提收佛靈骨役使鬼神一億人家爲起一塔四海之內合起八

萬四千。故此九州之地竝有遺塔。云是育王所造。當此周厲王之時。故塔興。周世經二十餘王。至秦始皇三十四年。焚燒典籍。育王諸塔由此淪亡。佛經流世。莫知所在。又釋道安朱士行等經錄。自云。始皇之時。有外國沙門釋利防等一十八賢者。齎持佛經來化。始皇。始皇弗從。遂囚禁之。夜有金剛丈六人來破獄。出之。始皇驚怖稽首謝焉。準此而言。則知秦漢以前已有佛法。尋道安所載十二賢者。亦在七十之數。今列仙傳見有七十二人。案文殊泥洹經。佛滅度後四百五十年。文殊至雪山中。爲五百仙人說法。又案地

理誌西域傳云雪山者卽蔥嶺也其下三十六國先來奉漢其蔥嶺連亘東至終南文殊來化仙人卽斯地也詳而驗之劉向所論可爲證矣後漢郊祀志曰佛者漢言覺也將以覺悟羣生也統其教以修善慈心爲主不殺生類專務清淨其精者爲沙門漢言息心剃髮毀容去家出俗絕情洗欲而歸於無爲也又以人死精神不滅隨復受形所行善惡後生皆有報應所貴行善修道以練其精神練而不已以至無生而得爲佛也身長丈六尺黃金色項中佩日月光變化無常無所不入故能化通萬物而大濟羣生也有

經書數千卷以虛無爲宗包羅精麤無所不統善爲
弘闊勝大之言所求在於一體之內所明在於視聽
之表歸於玄微深遠難得而測故王公大人觀生死
報應之際莫不悚然自失也

餘如漢法本內傳

魏書云蔡愔

得佛經四十二章及釋迦立像明帝令畫工圖寫置
於清涼臺及顯節陵上經文緘於蘭臺石室愔之還
也以白馬負經而至漢因立白馬寺於洛陽雍門西
其經旨大抵言生生之類皆因行業而起有過去當
今未來三世也其修道階次心行等級非一皆緣淺
以至深藉微以爲著率在於積仁順蠲嗜欲習虛靜

而成通照也其始修心則依佛法僧受三歸也三歸如君子之三畏又有五戒斷殺盜婬妄語飲酒大意與仁義禮信智同云奉持之則生人天勝處離鬼畜諸苦言善惡之處凡有六道在於防心正身口總謂十善也能具此者近獲天報遠得菩提佛以四月八日夜從母右脇而生超相異者三十有二既去世後弟子等以香木焚身靈骨分碎大小如粒其色紅白擊之不壞焚之不焦每有光明神驗及後阿育王者以神力分佛舍利使諸鬼神造八萬四千寶塔今洛陽彭城扶風蜀郡姑臧臨淄等皆有塔焉竝神異矣

吳書曰。赤烏四年。有康居國沙門康僧會者。行化道也。初達吳地。營立茅茨。設像行道。吳人初見。謂爲妖異。有司奏聞。吳主孫權問曰。佛有何靈驗。耶會曰。佛晦靈迹。出餘千載。遺骨舍利。應見無方。權曰。若得舍利。當爲起塔。經三七日。遂獲舍利。五色曜天。剖之。逾堅。燒之。不然。光明出。火作大蓮華。照曜宮殿。吳王歎異。信心乃發。爲造建初寺。度人出家。權問尙書令都鄉侯闕澤曰。漢明已來。凡有幾年。佛教入漢。旣久。何緣始至江東。澤曰。從永平十年至今。赤烏四年。合一百七十年。然以永平十四年。五岳道士與摩騰擲力。

之時道士不如南岳褚善信費叔才等在會自感而死門徒子弟歸葬南岳不預出家無人流布後遭漢政陵遲兵戈不息經今多載始得興行吳主曰孔丘老子得與佛比對不澤曰臣尋魯孔丘者英才誕秀聖德不羣世號素王制作經典訓獎周道教化來葉師儒之風澤潤今古亦有逸民如許成子原陽子莊子老子等百家子書皆修身自翫放暢山谷縱大其心學歸澹泊事乖人倫長幼之節亦非安世化民之風至漢景帝以黃帝老子義體尤深改子爲經始立道學敕令朝野悉諷誦焉若將孔老二家遠方佛法

遠則遠矣。所以然者。孔老設教法。天制用不敢違。天諸佛設教。天法奉行不敢違。佛以此言之。實非比對明矣。吳主大悅。以澤爲太子太傅。魏書。明帝會欲壞宮西浮圖。外國沙門乃金盤盛水。置於殿前。以舍利投水。仍有五色光起。帝加歎異。乃於道東作周閭百間。以爲精舍。吳後主孫皓虐政廢棄。姪祀佛寺相從。亦同廢限。諸臣僉曰。康會感瑞。太皇創寺。若遂除毀。恐貽後悔。後宮內掘地。得金像。皓乃穢之。陰處尤痛。聲叫難忍。太卜曰。犯大神所爲。於是廣祈名山大川。罔不畢至。而痛苦彌甚。有請祈佛者。皓曰。佛爲大神。

耶試可求之一請便愈乃以馬車迎會爲陳報應皓見本業百二十願皆爲眾生深加敬重仍於會所從受五戒準此掘地獲像明知秦周有佛教驗矣。

西晉愍帝建興元年有二石像浮於吳松江漁者疑爲海神延巫祝以迎之風濤更盛奉黃老者謂是天師復往迎接風浪如初奉佛居士朱鷹者吳縣人素有誠信共東靈寺帛尼并信者數人至漚瀆口延之風潮忽靜遙見二人至乃石像立高七尺波中捧上置通玄寺銘其背一名惟衛二名迦葉莫測帝代而字迹分明。

東晉孝武寧康三年二月八日沙門釋道安盛德昭彰擅名宇內於襄陽郭西鑄丈六無量壽像明年季冬嚴飾成就像乃西行上於萬山於時鄉邑驚嗟迎歸本寺仍以其夕出住寺門刺史郗恢乃改名金像寺梁武普通三年帝於建興苑鑄大金銅華趺高六尺廣一丈許敕劉孝儀爲文立碑贊德及周武之滅法也建德三年有太原公王康爲荊州刺史副將長孫哲不信佛法先欲壞之遣百餘人以繩繫項挽全不動哲謂不用力杖之令牽如故不動又加三百乃至五百牽之乃倒聲振地動卽令毀之揚聲自快乃

馳馬欲報刺史裁可百步。墮然落地失音。直視尋爾而卒。道俗唱快。當毀像時。於腋下倒垂衣內。著銘云。晉太元十九年歲次甲午。比丘道安於襄陽西郭造丈八金像一。驅此像更三周甲午。百八十年當滅。計勘年月悉符。同焉。信知印手聖人。誠不虛矣。然以事推安以太元三年戊寅之歲。則符堅建元十五年也。與朱序習郁被俘秦土。太元十年在關。便化。化後十年。歲方甲午。一往橫望。年紀參差。預覩未然。三經甲午。取其大運之極數。又顯印手之通聖云。

晉太元中。沙門曇翼者。於荊州造長沙寺。寺成而未

有佛像翼曰。大聖遺迹徧閭浮提。豈我無感而不降耶。乃潔齋祈仰。以二月八日夜現於城北。形儀嚴肅。高於七尺。光相衝天。諸處迎接。初不能起。翼曰。將非通感所致。降我長沙乎。乃與二人捧之。颯然輕舉。迎入寺中。昔經夜行人。謂怪異。以刀擊之。鏗然作聲。視乃金像。刀所擊胸文。見於外。後屬賓僧云。是育王像也。光上有字。時大重之。梁武聞之。屢迎東下。雖加事力。終無以致。後竭丹款。鄭重殷勤。方乃下船去。都十八里。帝自出迎。尋路放光相續不絕。道俗稱慶。後在太極殿重興。供養。晚出大通門入同泰寺。又加供養。

及寺火燒堂剝竝盡唯像居殿巋然獨存晚還荊州
本寺夜出繞塔降靈非一及元帝崩諸有凶事輒流
汗在地近太宗晏駕亦如前流汗其瑞極多晉咸和
中丹陽尹高悝見張侯橋浦有異光使人尋之得一
金像無有光趺載至長干巷口牛住不行乃任所之
徑趣長干寺後數年臨海漁人張係世於海口見銅
蓮華趺浮水上乃以表聞敕送像足宛然符合後有
天竺五僧詣悝云昔於本國得阿育王像至鄴遭亂
藏於河岸近感夢云吾已出江南爲高悝所得乃引
至寺僧見流涕像爲放光照於內外僧曰此像乃育

王第四女所造。文在華趺上。因檢同焉。又云本有圓光。計應尋至。後晉咸安元年。交州合浦采珠人董宗之。見海底光浮出水上。尋得佛光。以事奏聞。簡文敕施像背孔穴。懸同光色。無改四十餘年。江海隔絕。一朝方具。人百懷嗟。自晉及陳五代君王。莫不親敬。每有亢旱。請像乘輦入宮祈懇。無不畢雨。陳氏禎明中。其像自然轉身面西。雖正還爾。具以奏聞。帝延處太極。設齋行道。像乃脫七寶冠掛手。帝燒香誓曰。若國不祥。願重現相。仍以冠首。至明還脫。君臣失色。及隋滅陳。朝佐露首。面縛入京。文帝知之。延至宮內常侍。

供養後下敕曰朕老不能久立可作坐育王像進內其本像於興善供養寺見形小置於北面及明乃見在南相從內愧今見在殿圖寫殷矣

及仁壽立塔一百餘州皆有光

瑞如感應傳

元魏太武大延元年有沙門劉薩何者家於離石南高平原今慈州也昔行至涼州西番禾郡東北望御谷而遙禮曰此山當有像現靈相備者世樂時平如其有闕世亂民苦後經八十七歲至魏正光元年因大風雨雷震山巖挺出像身一丈八尺形好端嚴惟無其首登即選石命工安訖還落魏道陵遲其言驗

矣。至周元年始治涼州城東七里澗。忽見佛首石彩
光明。乃往安之。恰然符合神儀。彫缺四十餘年。身首
異處。二百餘里。一朝圓具。眾咸嗟歎。時有燈光流照。
鐘聲飛響。莫知來處。建德初年。像首頰落。大豕宰及
齊王躬往看之。乃令安處。夜落如故。經於數十更換。
餘頭終墜如故。後滅佛法。僅得四年。國喪滅嗣。斯言
又驗。故模寫其狀。畢量有差。今爲感通寺焉。何遂死
於酒泉城西七里澗中。骨如葵子。人拾穿之。如彼寺
碑。余以貞觀初年。歷遊關表。故謁何之本廟。在慈州
寺中。形影端峙。日有隆敬。自石隰慈嵐。延丹綏銀等。

州竝圖形崇養號爲劉師佛焉。

元魏天平年中定州募士孫敬德造觀音像自加禮敬後爲劫賊所引不勝拷楚妄承其死將加斬決夢一沙門令誦救生觀世音經千遍得脫有司執縛向市且行且誦臨刑滿千刀斫自折以爲三段皮肉不傷三換其刀終折如故視像頂上有刀三迹以狀奏聞丞相高歡表請免死敕寫其經廣布於世今謂高王觀世音焉自晉宋梁陳魏燕秦趙國分十六時經四百觀音地藏彌勒彌陀稱名念誦獲其將救者不可勝紀具諸傳錄故不備載。

梁高天鑒年於本第造光宅寺鑄金銅丈八像將就
冶鑄疑銅不足始欲上請便有傳詔領銅十五車至
云奉敕送寺卽就融寫一鑄便成惟覺高大試量乃
二丈二尺以狀奏聞敕云初不送銅斯爲通感遂鑄
於華跌以爲靈誌於今存焉。

陳武帝崩兒子蒨嗣業造輜輳車乃取梁武重雲殿
中珠珩以飾送終人力旣豐四面齊至但見雲氣擁
結流繞佛殿自餘方左開朗日耀須臾大雨洪注雷
電震吼烟張殿表火烈雲中流光布燄高下相屬竝
見重雲殿影金銀二像八部神王竝及帳座一時騰

舉烟火挾之歟然遠滅觀者傾國及晴之後覆看故所惟礎存焉至月餘日有從東州來者云於是日見殿影像乘空飛於海上有望海者有時見之。

魏氏洛京明帝胡后造永寧浮圖去地千尺閣浮一州無勝斯塔後爲天震緣略同前有人東海亦見其相又魏氏北臺恆安石窟三十里內連次而列高二千餘丈內受千人終劫不朽震旦海曲神州諸山往往聖寺感見非一且述三兩用爲寶錄昔晉太元初有燉煌沙門竺曇猷乞食坐禪強志勤業遊會稽剡縣石城山羣虎來前猷爲說法一虎獨睡乃以如意

打頭有十圍蛇繞之初無怖色又山神捨宅與之又往赤城山宴坐此山與天台瀑布四明連屬父老云天台山有聖寺猷往尋之石橋跨谷青滑難度橫石斷路無由得達夕宿橋首聞彼行道唱薩聲便潔齋自勵忽見橫石洞開猷便前度具覩精舍神僧燒香中食畢謂曰卻後十年自當來此又有齊鄴下大莊嚴寺沙門圓通者感一神僧夏中聽講自恣訖辭云在竹林寺遊通過寺通具問道徑明年尋至在鼓山東鄴之西北神僧迎接具見門闕房宇華敞林竹切天經宿周流意言道合便有終焉之思神僧爲諮大

和上乃不許之。及還返路三里之外。返望莫覩後之往者。不知某處。近鄧州沙門道勤者。於州北倚立山。追訪仙寺。如言具見。周循歷覽。實爲佳寺。眾具皆備。但不見人。卻下重尋。便失歸路。乃於道次築室擬尋。又汾州東界山抱福巖者。山居之僧。數見沙門乘空來往。又益州東三學山。常有仙燈。空中照耀。齋日倍多。又涼州南洪崖窟。沮渠蒙遜所造碑。寺見存有。素聖僧常自行道人來。便止人去尋行。故其傍側足跡。納納爾斯徒眾矣。不可具云。余聞入大乘論尊者。賓頭盧羅怛羅等十六大阿羅漢。住世通法。又有九億

無學亦此州中未人涅槃準此而詳今諸山居多聞磬聲或尋遇寺豈非諸聖之所處乎。

今約通局諸門以分。一約往世二約賢劫三約釋迦一佛爲候。初約往劫用辯通塞者如上所列往劫行事。薩捶捨身流血尙在。達拏捨子杖捶遺血布髮掩泥之所捨身求偈之地。月光斬首尸毗飼鷹斯等遺蹤竝惟古劫計數災蕩如何尙在。印度名僧亦決斯致理如所問無宜獨畱而往事往生彌綸於五印者有人云此乃如來神力菩薩至行雖有三災不可除滅後成世界依而集之有人言三災之化無往不除。

但欲使後代可師仰故世界初成依古遺蹤相似而現竝佛之化迹神感所爲故五不思議中一爲佛力也。所以往劫生事依依列之。二約同劫以明且如一鉢千佛共同。故傳云釋迦受食四王奉鉢滅後流行至毗舍離若干百年又至乾陀衛又至月支于闐龜茲當達振旦返師子國還來天竺上昇兜率天彌勒見曰釋迦佛鉢今來至此。七日供養還下龍宮彌勒道成四王還獻。二者龍宮佛影千佛同留。三者方石說法千佛同坐。卽健陀卑鉢樹下者。四者石塔盛衰千佛同候。上傳之中多明四佛行坐之迹準此未來

抑亦可見。三明釋迦一代通局不等。如天道寶階滅。無遺緒。吒王大塔七化已。三道樹滅而更生。佛迹毀而還現。楊枝摧而重出。舍利試而逾靈。諸如此例。故應不通後佛。至如維足迦葉。畱化慈尊。山宮明辯。持身待聖。沮渠滅定之侶。摩支應供之徒。事局未來。神遊絕域。皆爲明道。開顯塵蒙。慈導有情。澄神諸有。故也。

時住篇第七

案索訶世界一大劫中。千佛出世。尋夫劫波之號。不可以時數推之。假以方石芥城。準爲一期之候。中含

四大中劫謂成住壞空也。如從十歲增至八萬復從八萬至於十歲經二十返爲一小劫。二十小劫爲一成劫。以年算之則經八千萬萬億百千八百萬八萬歲也。止爲一小劫耳。今成劫已過。入住劫來經九小劫。釋迦如來住劫第四。尙餘九百九十六佛次續興焉。依摩耶經如來滅後正法五百年。像法一千年。又依善見毗婆沙云。如來滅後正法千年。像法亦爾。以度女人故。正法滅五百年。若諸女人能遵八敬如法行道正法住世還得千年。又云佛法住世一萬年初五千年修道出家得三達靈智。後五千年出家修道。

不得三達靈智過此已後經歸龍宮像自頽壞諸比

丘等同於俗流惟有剃髮袈裟而已

佛法之垂振且三被誅焚初赫

連勃勃號為夏國初破長安遇僧皆殺二魏太武用崔皓言夷滅三寶後悔皓加五刑三周武帝但

令還俗皆不得其死如傳所詳也。

教相篇第八

自釋教之來振旦開濟極焉發悟疏通廓清塵染其中瑞應具篇前聞且述數條用程無惑昔土行尋教意在大乘將發西域乃有畱難遂將經投火經身不灰火為之滅東達此土即放光經是也又曇無讖獲涅槃經至於涼土盜者夜竊舉而不起稽首謝焉周

武之凌法也。像毀經焚。咸見藏經相從騰上。奄入空際。如斯眾矣。不可具書。然弘教在人。有國為本。度人立寺。圖像譯經。世約相求。故敍由來。昌明佛教。而漢魏以往。固無得而聞。晉宋迄今。輒略銓序。

晉世祖武皇帝

大弘佛事
廣樹伽藍。

晉惠帝

洛下造興聖寺
供常百僧。

晉敏帝

於長安造通虛白馬二寺。

右西晉二京合寺一百八十所。譯經一十三人。七十三部。僧尼三千七百人。

晉中宗元帝

江左造瓦官龍宮二寺
度丹陽千僧。

晉肅宗明帝

造明興道場二寺集義學百僧。

晉顯宗成帝

造中興鹿野二寺義學十僧。

晉太宗簡文帝

造像度僧立寺。長干起木塔。

晉烈宗武帝

造皇泰寺本第立本起寺。

晉安帝

於育王塔立大石寺。

右東晉一百四載立寺一千七百六十八譯經二

十七人二百六十三部僧尼二萬四千人。

宋高祖武帝

口誦梵本手寫戒經造靈根法王四寺供養千僧。

宋太宗明帝

造丈八金像齋感舍利。造弘普中寺召諸名僧。

宋太祖文帝

奉齋不殺造禪靈寺常供千僧。

右宋世合寺一千九百一十三譯經二百一十部。

僧尼三萬六千人。

齊太祖高帝

手寫法華口誦般若。四月八日。常傳金像。七月半。白普寺送盆供僧三百。造陟

毗正觀

二寺。

齊世祖武帝

造招玄遊賢二寺三百名僧。二教格畫四年考定。

齊高宗明帝

寫一切經。造千金像。口誦般若。常轉法華。造歸依寺。召集禪僧。常持六齋。

右齊世合寺二千一十五寺。譯經七十二部。僧尼

三萬二千五百人。

梁高祖武帝

制五時論。轉四方等造光宅同泰五寺。常供千僧。國內普持六齋。入戒。

梁太宗簡文帝

建資敬報恩二寺。刺血自書般若十部。太后忌日不食。而齋撰法集記二

百餘卷法寶聯
璧亦二百餘卷。

梁中宗元帝

造天居天宮二寺供有千僧自講法華成實論。

右梁世合寺二千八百四十六譯經二百四十八部僧尼八萬二千七百人。

梁宣帝

梁明帝

右二主中興社稷於荊州造天皇陟岵大明等諸寺治在江陵一州佛寺一百八所僧尼三千二百人。

陳高祖武帝

楊州造東安興聖天居四寺寫一切經一十二藏造金銅像一百萬軀度僧七

千人。治故寺三十二所。

陳世祖文帝

寫五十藏經。度僧尼二千人。治故寺六十所。

陳高宗宣帝

楊州禁中造太皇寺七級木塔。又造崇皇寺刹高十五丈。安佛爪。造金像二萬

餘軀。治故寺五十所。故像一百三十萬軀。寫十二藏經。度一萬僧。

右陳世五主三十四年寺有一千二百三十二國
家新寺一千七百。官造者六十八。郭內大寺三百
餘。僧尼三萬二千人。譯經十一部。輿地圖云。梁帝
都下舊有七百餘寺。屬侯景作亂。焚燒蕩盡。有陳
既統國及下民。備皆修葺。表塔相望。星羅揭輦。經
像之富不可殫言。

魏元太祖道武帝於虞地造十五級塔文造開泰定國二寺寫一切經造千金像三百

名僧每
月法集

魏高宗文成帝重復佛教更開釋門凡度僧尼三萬許人

魏顯祖獻文帝造招隱寺召坐禪僧

魏高祖孝文帝於鄴造安養寺召四方僧六宮侍女皆持年三月六齋有慕道者放令出

家手不釋卷頃便為講為先皇再治大覺大行供施度僧尼一萬四千人

魏世宗宣武帝於式乾殿自講維摩經造普通大定四寺常供千僧

魏肅宗孝明帝於鄴下造大覺寺

魏敬宗孝莊帝造五精舍一萬石像

西魏武帝長安造陟岵寺供二百僧

魏文帝

造般若寺用給貧老口誦法華身持佛戒。

右元魏君臨一十七帝一百七十年國家大寺四

十七所北臺恆安鑄石置龕連三十里王公等寺

八百三十九所百姓所造寺者三萬餘所總度僧

尼二百餘萬譯經四十九部佛教東流此焉為盛

惟太武世信用司徒崔皓佞說凌廢正教潛隱七

年後知詐妄戮誅崔氏還復佛教光闡於前。

齊高祖文宣皇帝

登祚受禪於僧稱禪師受菩薩戒斷肉禁酒放鷹除網又斷天下屠

年三月六勸民齋戒公私董辛亦除滅之度人八千。

齊肅宗孝昭帝

為先皇寫經一十二藏合三萬八千四十七卷度三千許僧。

齊世祖武成帝

造寶塔轉
大品經。

右高齊六君二十八載皇家立寺四十三所譯經

一十四部度人與魏相接。

周孝明帝

為先皇造織成像高二丈六尺。
等身檀像一十二軀并諸侍衛。

周太祖文帝

於長安立追遠陟岵大乘等六寺度
一千人。又造五寺供養寶禪師徒眾。

周高祖武帝

為文皇造錦像高一丈六尺。寶塔一百
二十區。又京下造寧國會昌永寧三寺。

凡度僧一千八百人。寫經一千七百部。後遇
張賓所佞方為不善之首。廢僧尼三百萬人。

周孝宣帝

重隆佛日。造素像四龕一萬餘軀。寫
般若經三千卷。六齋八戒常弘不絕。

右周世宇文氏五帝二十五年合寺九百三十一

所譯經一十六部。

隋高祖文帝

開皇三年周朝廢寺咸為立之名山之下各為立寺一百餘州立舍利塔

度僧尼二十三萬人立寺三千七百九十二所寫經四十六藏一十三萬二千八十六卷治故經三

千八百五十部造像十萬六千五百八十軀自餘別造不可具記

隋煬帝

為文皇獻后於長安造二禪定并二木塔并立別寺十所官供四事治故經六百一十二

藏二萬九千一百七十二部治故像一十萬一千軀造新像三千八百五十度六千二百人

右隋代二君三十七年寺有三千九百八十五僧

尼二十三萬六千二百譯經八十二部

皇唐啟運弘敞釋門功業崇繁未可勝紀故難叙出

大唐永徽元年歲維庚戌終南太一山豐德寺沙

門吳興釋道宣往參譯經旁觀別傳文廣難尋故

略舉其要并潤其色同成其類庶將來好事用裨
精爽云。

釋迦方志卷第四

葉恭綽施貲敬刻釋迦方志四卷連圈計字四萬
二千三百一十五箇計銀一百六十九圓二角六
分籤條尾葉功德書十部計銀四圓大共支銀一
百七十三圓二角六分

民國十三年仲冬支那內學院識

二四、○○○○元：盡虛空遍法界一切眾生，皆能早日覺醒，念佛往生西方淨土，共成佛道。

以上計新台幣：二四、○○○○元，恭印一、○○○○本。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有怨枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸含識
同證無上道

佛曆二五六年／西元二〇一七年十一月

恭印：一〇〇〇本

流水號：15445
書號：CH290-01

釋迦方志

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：www.budaedu.org

E-mail: budaedu@budaedu.org

電話：(〇二)三三九五一一一九八

傳真：(〇二)三三九一一三四一五

劃撥戶名：財團法人佛陀教育基金會

郵局劃撥帳號：〇七六九九七七九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇〇四五九七五〇三

本會經書免費結緣之請取方式如下：

(一)親臨本會二樓講堂。(二)利用傳真：(02) 23965959

(三)撥打電話：(02) 23951198 分機：11、12

(四)網址：<http://www.budaedu.org/books/>。(五)寫信指定：本會法實流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通：

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→253、297 開南商工→208

仁愛路、杭州南路(紹興街)口→630、270、263、245、621、651、37、261

行政院新聞局出版事業登記證局版臺業字第三八六九號

